


金石萃編


九十一之三




			二	漢
		一	七	書
		六	三	門
六	三	六	七	
冊	架	函	號	類

庫文閣內			
五	二		漢
函	四		書
六	七		
三	三		
架	冊	號	類

內閣文庫	
番號	漢 2473
冊數	63 (33)
函號	297 110





金石萃編卷九十一

賜進士出身 誥授光祿大夫刑部右侍郎加七級王昶撰

唐五十一



張安生墓誌

石高廣俱二尺五寸二十八行行二十九字正書
蓋題大唐故張府君墓誌銘九字篆書在西安府

唐故雲麾將軍行右龍武軍將軍上柱國開國侯南陽

張公墓誌銘 并序

鳥能飛万里其有鵬乎魚能吸百川其有鯤乎夫鯤鵬
之處者非滄海而不居非扶搖而不動豈秋潦夕吹而
能加其志焉士有佐世之材者非艱難而不投非



君而不事豈升筭凡類而能効其節焉則我南陽張
公功可著矣公諱安生譜燦清華門多高士漢有留侯
秘略晉有司空博識累萊冠冕暉曜相繼祖諱泰孝諱
貞並儒素隱躬遁跡不仕田園蘊道於高尚詩書襲
德於風雅後曰公列爵追贈考狀風郡司馬父因子貴
以忠彰孝公駿骨天資偉異神秀拔奇材於衆外先武
略於群石景雲中屬韋氏竊權群凶暴溢擾我黔庶殘
我王室公乃叶忠謀爲佐弼識潛龍必躍於雲霄
知北鷄伏誅於斧質提一劍而直入掃九重以殊謚再
清京兆之靈武天重捧長安之日謀深於周邵功越

於平勃古往已來莫之與正公以功高職卑者志士之
讓初退後進者達人之漸故辭公侯之封就戈戟之任
畢能身榮於紫綬門曜於丹戟得馮異大樹之名免簞
何小過之責有始有卒其惟公平遂解褐授果毅二遷
折衝一拜郎將拜轉中郎畢于龍武將軍矣食邑九百
戶公歷官無虧公務首要處事有則人莫能犯或帝
居內宮則警衛嚴肅或駕行外仗則旗隊克齊其動
也若鷹鷂迴迅其止也狀師席群栴電轉星流比其速
雲迴霞卷處其事暨乎晚載自強不息者繫公而口以
天寶十三載冬十一月十日扈從薨于昭應縣之官第

也享載七十有一初公染疾城中將口湯所左右留勸
佐色不從曰吾亦知難保者命但殞隨口君側以表忠
誠亦知易歿者身但死在營間用彰勲節使魂歸帝
鄉之路心存皇闕之下願之足矣汝等勿違言畢狀
疾卽行到遂歿彼所謂臨事無苟憚臨困無苟免及迴
擱于路誰不傷悼嗣子庭訓等侍疾而捧藥淚枯返柩
而攀輿氣輟夫人太原郡君王氏先公近歿苦蘆猶新
纒經重舉泣地未絕踰天更哀又以翌載春二月十二
日別兆墓于龍首原之禮也素墳上築而永固廳堂下
鬣而深堅白雲孤飛招將軍之勇氣綠栢旁植表武士

之高節恐陵谷有遷刻銘以記銘曰
鶡之迅兮飛已絕士之勇兮謀且決臨難不懼兮忠臣
節奉我明后兮誅暴孽鵠鵠貴兮鷹行列花萼忽凋
兮一枝缺獨有功名兮千載存列石洗銘兮記墳闕

按此碑但稱諱安生而不及其字與張希古碑但
稱字而不及諱皆行文之略又希古碑有書人而
無撰人此碑則書撰人皆無亦皆刻誌之變例未
必取法于漢也碑書祖若父皆無官位其家世寒
微可知其云景雲中屬韋氏竊權殘我王室公乃
提一劍而直入掃九重以殄謚再清京兆之天重

捧長安之日云云此指元宗誅韋氏睿宗卽帝位
 之事唐書睿宗紀景雲元年六月壬午韋皇后弒
 中宗立溫王重茂爲皇太子又矯遺詔自立爲皇
 太后皇太子卽皇帝位庚子臨淄郡王隆基卽元宗
 率萬騎兵入北軍討亂誅韋氏安樂公主等甲辰
 安國相王卽皇帝位是時張安生不過在萬騎兵
 中之一人事定之後敘其微勞因授以果毅折衝
 等官也碑又云天寶十三載冬十一月十日扈從
 薨于昭應縣之官第唐書元宗紀天寶十三載十
 月乙酉幸華清宮又地理志京兆府昭應縣有宮

在驪山下貞觀十八年置咸亨二年始名溫泉宮
 天寶元年更驪山曰會昌山三載析置會昌縣六
 載更溫泉曰華清宮治陽井爲池環山列宮室又
 築羅城置百司及十宅七載更會昌縣及山曰昭
 應碑稱安生薨于昭應縣之官第者蓋扈從百司
 之第也碑不著安生里居但云墓于龍首原長安
 志萬年縣有龍首鄉在縣東二十五里當卽龍首
 原地理志京兆府萬年縣天寶七載改曰咸寧安
 生或卽家于此歟碑書譜牒作譜姝冠冕作冠冕
 皆別體蕭何作蕭何則筆誤也



少林寺神王師子記

石高三尺三寸五分廣二尺五寸二
十六行行三十五行正書在少林寺

勅還少林寺神王師子記

大周天冊萬歲金輪聖神皇帝如意元年迎神王入內
其神王元是泥素彩裝其皇帝敬重神王脫空口佇紉
以金裝為年歲多日金薄彫落後開元廿年僧麤器報
以金裝恐後僧徒貴勝不知口由立一小碑述久視元
年還神王 勅具錄如後 少林寺 神王二

右去如意之年奉

勅將前件神王入內比不敢

陳請今內出功德散與諸寺且少林神王送在大福先

寺但山寺去都稍遠巧至難遇前件神王元在少林上

坊普光佛堂今者現闕其大福先口惣得神王一十五

軀望請前件兩軀得還少林令本處尊儀具足冀得幽

山功德不闕莊嚴口往來有所瞻仰謹詣光政門奉狀

陳請以聞伏希 恩旨 久視元年九月十三日

少林寺主義彛等狀 僧麤藏 勅好還少林寺

門司李阿毛宣 口監門直長路尙賓 左監

門直長成思貞 押門長上果毅杜行敦 周

還少林寺師子 勅一道 少林寺 師子二

師子郎二 右件師子等並是少林寺普光堂前

隨神王功德其神王奉今月十三日

勅還少林

寺爲前狀不別顯師子等福先寺綱維但付神王未付

師子既是隨神王一鋪功德望請許將還山供養謹詣

光政門奉狀以聞伏聽

勅旨

久視元年九

月廿九日少林寺主僧義昇等狀

勅好

九

月廿九日門司李仁福膝

右監門直長路尙賓

左監門直長成思貞

樺門長上果毅杜行敦

周少林寺賀師子

勅一道

少林寺僧義

昇等言伏奉九月十三日

恩勅賜還神王又奉其

月廿九日恩勅兼還師子

恩波洵委喜懼兼深僧

義昇等誠惶誠恐死罪死罪但此功德昔是素裝忽觀

靈姿遂如金飾 鑿工再造 天巧自然 神之力巍

巍如是緇徒跼影若攀兜率之宮靈相生光似降注巖

之國手舞足蹈倍百恒情無任荷懼屏營之至謹附表

陳謝以聞謹言 久視元年十月日少林寺主僧義昇

等上奉 勅好放阿師去 久視元年十月六日門

司陳嘉逸膝 普光堂內一佛二菩薩迦菜阿難及門

外二金剛二神王二師子城內少有傳聞博士姓李名

雅永平年造此尊像奇妙少雙菩薩儀容卒不可有阿

難迦菜貌相肅然合掌虔恭實難希有門外二金剛鳥

金石考卷九十一
鵠不口口承稱說異相屢現其師子者乍著儀容或噴
或喜畫工巧近不可圖容二師子郎常相口口口一鋪
功德不可思議

天寶十四載八月十五日建

普光院立碑僧鑿器

修造僧智通法師

同修造僧同光禪師

都維那僧法忍

僧普門

僧智晉

僧惠覺禪師

清河張景昇刻字

碑載久視年間僧義獎等表狀及武氏口勅碑小非
名筆故諸錄遺之葉并叔官於登封而石刻記亦不

載余至少林周行廊廡見此石嵌置東廡壁間亟搨
得之知考古必須親閱也

金石文
字記

張希古墓誌

石高二尺九寸七分廣三尺四分二十二
行行二十二字行書今在吳縣靈巖山館

大唐故游擊將軍守左衛馬邑郡尚德府折衝都尉左
龍武軍宿衛上柱國張府君墓誌銘

并序

鷹門田穎書

噫夫蒼穹不仁殮我能幹德星落彩和璧韜光者歟爰
我所環清河張公字希古晉司空華之裔緒也惟祖厥
父耿逸馳芳競惕怡然匪干榮祿優遊自得凜霜松之

金石錄卷九十一
搯岐疑孤拔挺風雲之氣公負河岳之粹英育辰象之
靈質亭亭高聳遠振雄名傑傑威稜龍城獨步門延賓
侶豈謝季倫精舍樓臺有齊須達加以武略兼著公忠
必聞歷踐榮班宿衛 清禁累遷馬邑郡尙德府折衝
都尉游擊將軍上柱國負外置同正負莫不獻肝膽於
玉階輸腹心於金闕惟謹惟勵不愆不瑕豈啻二豎興
災兩搯捕禍藥物無護酷裂所鍾白日長辭黃泉永赴
則以天寶十四載十月十七日終醴泉里之私第春秋
七十有三天寶十有五載四月二日窆于鳳城南樊川
之北原禮也太夫人天水趙氏恭而有禮時稱孟軻之

毋珪璋播美松竹茂心誕三子長日行瑾次日崇積並
武部常選季子談俊衛尉寺武器署丞嗚呼誰免乎榮
枯適覩全盛今已淪殂梁木折太山頽三子腸斷二女
情摧咄嗟人代天道遭迴其詞曰

公之英聲振區宇兮公之勇義如龍虬兮彼上蒼蒼何
不仁兮僉歿我之至所環兮泉門此日一闕閑兮玉顏
何春再相詣予表余平生情慙至兮飭琬瓊以鑿銘記
予

天寶十五載歲次景申四月甲申朔一日甲申建

碑載府君字希古不言其名曾爲馬邑郡尙德府折

衝都尉馬邑卽朔州唐書不及府名亦可以補史之

缺

關中金
石記

唐之府兵皆隸於諸衛左右衛領六十府諸衛領五十至四十其餘隸東宮六率此尙德府則左衛所領也尙德府領于左衛而又稱左龍武軍宿衛者蓋番上宿衛時別有配隸非必就本衛爾希古子二人俱武部常選天寶十一載改兵部曰武部故也

潛研堂
金石文

跋
尾

碑爲田穎行書竇泉述書賦有販書人田穎注云長安人志凡識滯疑卽此人但竇云長安人而此題曰

雁門爲不同

蛾術
編

誌云清河張公字希古晉司空華之裔孫也書字而不書名未審當日何所避忌遂使後世不知其名也歷官有云累遷馬邑郡尙德府折衝都尉游擊將軍上柱國員外置同正員新唐書兵制太宗貞觀十年號統軍爲折衝都尉別將爲果毅都尉諸府總曰折衝府凡天下十道置府六百三十四皆有名號杜牧之云折衝果毅府五百七十四會要云關內置府二百六十一又置折衝府二百八十一今此誌尙德府亦當時名號可見者其他如姚懿碑貶授晉州高陽府折衝都尉臧懷恪神道碑七子內有游擊將

軍崇仁府折衝希崇漁陽郡君李龕銘有轅轅府折衝都尉郭敬之廟碑有雍北府金谷府碑陰有成阜府興德府魯陽府李輔光墓誌有涿州仁賢府張誥墓誌銘祖元植皇朝盧龍府折衝田琬德政碑以功授合黎府別將歷果毅轉折衝皆不可更僕數宜類舉以與史志相證也

授堂金石跋

房史君題記

石高一尺六寸七分廣三尺五寸共十三行行五字正書在略陽縣

太原王□□□人名□□□仁□□□□□□□書中郎守武興郡四境山嶙峋構新亭迓佳賓日翠峯景

寔真唐天寶房史君上錫宴刊堅珉亭之右名不泯

按文凡六十二字而泐其十四字存者皆三字爲句二句一韻中有守武興句武興者卽今碑所在之略陽縣屬今陝西漢中府魏正始三年置武興鎮尋改置州郡郡有北谷水水經注云北谷水出武興東北而西南流逕武興城北又南轉逕其城東而南與一水合是也又方輿勝覽武興山在興州西一里古興州城于此隋大業初改順政郡唐時爲興州順政郡屬山南西道此武興之可攷者如此至翠峯亭及房史君皆無攷据文有天寶字

附天寶末年

憫忠寺寶塔頌

碑高五尺廣三尺二寸二分左行二十二行行字三十七至四十二不等行書在京師憫忠寺今名法源寺

范陽郡憫忠寺

御史大夫史思明奉為

大唐光

天大聖文武孝感皇帝敬元垢淨光寶塔頌

范陽府功曹參軍兼節度掌書記張不矜撰

承奉郎守經略軍曹參軍蘇靈芝書

惟唐紹統于歲作噩天宅幽都于鎮戎索彼命啓与禪

虞繼 鳳舉而龍躍馭閭闔而朝 南面服日月而昇

寶殿在璿衡以正乾坤握金鏡于臨宇縣東宅四水西

都八川天應景福億萬斯年神祇盻蠶而不祐風化洋

溢而昭宣凝心姑射既邁黃軒之理端思真境高撫洪

崖之肩迥出三界超居四禪我御史大夫忠而孝哲而

賢禪 我唐祚崇斯福田昔在棘城結頽已修於寶塔

屬茲版蕩除惡務靜於幽燕開拓郡縣馳突戈鋌咸荷

威力掃逆清邊樹茲幢相遊刃忘筌割淨費以檀捨施

瓊俸於慈緣爰居爰處載詢載度薤金界於祇園擇伽

藍之勝託徵郢匠稽朴鄧具鈎繩備丹雘才生明而畚

鍤攸萃月貞朔而陶甓斯作墜峻砌而崛起堂皇聚植

金台之經卷九十一
一
餘而上干寥廓尔其庀徒有卽力工惟時隱金椎以雷
動走瓴甌以星馳椽之登登斗拱磊砢以狀衛築之閣
閣蹙蹙蘇羅而緝熙駢密石以䟽趾齊玉璫以鎮陞斑
閒布白九隅八維風伯雨師扣靈壇而請命雷公電女
攤仙座以忘疲熠如聚鴈赫若奔螭岌業天假髣像神
資千龕擲比以攢構万塔陵兢而護持觀其捫重局披
藻井鴻蒙異狀啗咤靈影霞駭雲蔚陽舒陰靜遊三界
而須臾視一劫而俄頃示大方便開大法境聞偈而刀
輪折鋒承風而火穿収猛疑若蠶樓之孤秀皎類扶桑
之映迴蓮花吐日攢太華之三峯香鑪抱雲矗廬巖之

一頂若乃八部經行万方委口離火宅啓椽喻魚貫爭
上鴈行齊赴躋穹崇陟迴牙嗜真如者搏級聚武而踟
行慕釋猷者陆虚口倅而徐步攀芬燎以失視援并餘
以增懼龍爲翁赫扶構櫺而蓄威鬼神睚盱捫頰辟以
含怒將以經啓万祀永代作固置咒於梵刹之中釋網
於毗耶之路啓招提之勝果祛樊籠之緇蠹行善者口
痒而爭趨爲惡者震慄而憂怖逗塔影者洽背而魂悚
聞鈴音者叩頂而心注是用敬
我天威保
我
唐祚彼憧相之徼福荷无量之率裕也客有叩虛幕府
忝掾神州媿三語之默對歸八解之禪流歸然寶塔永

贊鴻猷護鵝珠以守戎持鶴稱以精修刻字金版垂芳
朔幽雲行雨施自公乃侯永錫難老厥德允修恭察視
之 嚴命敢不拜敷 王休

至德二載十一月十五日建

此蘇靈芝爲史思明書也思明爲臣則助逆爲賊則
弑主篡位乃唐之所不宜存其跡者易人之傳其碑
無亦以妙札之故今觀其字揜有李顏二家而視北
海則加莊視太師又多雋誠足述也

墨林
快事

宋文惟簡虜庭事實曰燕京城東壁有大寺一區名
曰憫忠唐太宗征高麗回念忠臣義士沒於王事者

建此寺爲之薦福東西有兩磚塔高可十丈是安祿
山史思明所建此碑稱御史大夫史思明奉爲大唐
光天大聖文武孝感皇帝敬无垢淨光寶塔頌者是
也春明夢餘錄曰此碑蓋建於思明初歸附之時其
碑完好近日劉同人名作帝京景物略謂碑上半斷
裂不可讀且蘇靈芝書名甚著當時乃謂爲李北海
自鐫名尤誤之甚不知北海自鐫名乃伏靈芝也此
碑書丹于石故以左爲前 舊唐書肅宗紀至德二
載十二月己丑賊將僞范陽節度使史思明以其兵
衆八萬與僞河東節度使高秀巖竝表送降三載正

月戊寅上皇御宣政殿冊皇帝尊號曰光天文武大
聖孝感皇帝二月丁未大赦天下改至德三載爲乾
元元年今此碑建於二載十一月而已稱尊號又以
大聖字移在文武之上與史書不合 宣和書譜蘇
靈芝儒生也嘗爲易州刺史郭明肅書候臺記靈芝
行書有二王法而成就頓放當與徐浩鴈行戈脚復
類世南體亦善於臨倣者 予後至燕一日與鄞人
萬言同至憫忠寺諦觀此碑萬言曰前行大唐光天大
聖文武孝感皇帝及中間唐字史思明字類磨去重
刻者石皆凹而首行憫忠寺上元只二字今改范陽

郡三字蓋思明復叛之後磨去之及思明誅後此地
歸唐後人重刻者也當日君臣之分殆如奕棊然非
親至其下摩挲遺石而徒搨紙上之字未有能得其
情者若年月尊號之先後亦從此而無疑矣

金石文
字記

按唐史肅宗至德二載安祿山已死安慶緒忌史思
明之強遣安承慶安守忠阿史那往徵兵因密圖之
思明納判官耿仁智等之謀乃囚承慶等以所部十
三郡及兵八萬來降上大喜以思明爲歸義王范陽
節度使未幾復叛此碑乃建於初歸附之時而以媚

唐也

庚子鋪
夏記

右憫忠寺寶塔頌宛平孫侍郎耳伯著春明夢餘錄
崑山顧處士寧人金石文字記皆論之余往觀焉碑
首范陽郡守字史思明三字次行大唐等十二字文
中維唐紹統及彼命啓與禪虞又東宅四水西都八
川暨唐祚字至德二載字其文深陷然書法實出一
人始悟侍郎處士所云猶未爲定論也考思明之降
在至德二載十二月至明年正月肅宗始加尊號二
月乃赦天下改元碑旣建于二載十一月不應預書
尊號又思明初附肅宗授以歸義王范陽節度使若
碑建于降後宜大書王爵不當祇稱御史大夫則是

碑之建蓋在思明未降唐之先范陽郡三字其初本
二字祿山僭稱范陽爲東都必東都也大唐一行其
初必祿山父子僞號文中唐字其初必燕字而至德
二載其初必祿山父子僭號之年無疑載攷安慶緒
襲位賜思明姓安名榮國迨旣降附復更舊名因命
靈芝改書者爾碑文以左爲前寧人謂書丹于石之
故疑從祿山俗尙未可定也不矜與判官耿仁智同
僚思明之將復叛也表請誅李光弼不矜實爲起草
辭曰陛下不爲臣誅光弼臣當自引兵就太原誅口
及將入函爲仁智削去思明知之遂執二人仁智死

不矜度難獨免可知已當日思明降而復叛既誅之
後唐人見其碑踣之惟恐不力安有反勒其名于石
者乎此其事之所必無也

曝書亭集

按朱彝尊之辨詳矣然尚有未盡者原碑至德二載
四字亦係改刻至字微有聖字形載字微有年字形
祿山偽建元聖武至德二載字先必聖武某年字也
蘇靈芝署銜經略參軍經略字亦改刻其先或署偽
官也又改刻除惡務靜句除惡字至行末以二字佔
用四字格務靜字另行以二字佔用三字格除務靜
三字係就文陷刻而惡字則石面平添者疑原文諛

逆之辭有擡頭空格迨後滿格填湊故參錯若此字
形欹斜而長不復成書也其地改刻之字如唐紹統
兮兮字斗拱字唐祚字鎮陲陲字皆朱彝尊所未按
又除惡務靜字朱彝尊誤鈔作盡字髣像字誤
鈔作髣字今一依原碑校正又原碑以首行十六字
佔用十八字格金石文字記謂改刻者止於大唐光
天大聖文武孝感皇帝十二字而不知敬元垢淨光
五字亦改刻者也以碑末聖武偽元字考之則首行
必為祿山偽號朱彝尊之說允無疑矣碑在本寺方
丈前穿廊東壁上石質堅瑩唐碑之最完好者

欽

定日下
舊聞考

頌范陽府節度掌書記張不矜撰不云范陽郡而云府者蓋祿山僭號之後改郡爲府爾蘇靈芝署衙云承奉郎守經略軍冑曹參軍按唐書地理志幽州城內有經略軍百官志諸軍各置使一人軍皆有倉兵冑三曹參軍事故經略軍得置冑曹也三潛研堂金石文跋尾頌由史思明旣降爲肅宗作也按舊唐書肅宗紀思明以至德二載十二月己丑表降然此頌已載十一月則當時尙未臣順兒徒豈肯早爲稱祝蓋思明旣欲歸命遂先以此貢媚爲容身之具亦或然也或云

至德二載字凹陷亦似後重刻者此又不然頌內明言作噩繼統據爾雅歲在酉曰作噩至德二載正爲丁酉蓋必無誤也若稱肅宗尊號以大聖字移文武之上與史不合則如顧君云思明誅後此地歸唐後人重刻者近之 頌文自左起其文則范陽府功曹參軍兼節度掌書記張不矜撰舊唐書地理志范陽郡爲大都督府功曹列於府屬是宜結銜變文言府矣不矜見史思明傳令耿仁智張不矜修表請誅光弼以謝河北者修表卽書記之任也與碑可相證後又列承奉郎守經略軍冑曹參軍蘇靈芝書新唐書

地理志范陽郡城內有經略軍今此題與志合而靈
芝當開元二十七年猶稱前行易州錄事鐵像碑頌至此
爲經略軍之屬蓋亦凶孽引置幕下矣授堂金石跋

思道禪師墓誌

石高二尺一寸八分廣二尺七分十七
行行二十字至二十五字不等行書

威神寺故思道禪師墓誌

和上俗姓師諱思道絳州夏縣平原人也天縱其志七
歲出家人推其聰十八剃髮事人不事爲人不爲同鵲
巢于頂之年護浮囊無缺之日次就有德轉相師師禪
行法門戒律經論耳目聞見紀之心曾緇錫來求簪裾

欽仰聽習者鶴林若市頂謁者庶苑如雲去至德二載
春秋八十有一僧夏六十一時催二鼠妖纏十夢其年
十二月示身有疾隨爲衆生其月二日禪河流竭坐般
涅槃驚慟知聞悲覃飛走孫威神寺主僧承嗣五內摧
裂躡躑攀號聲竭潛哀淚盡續血至乾元元年十二月
二日遷于條山之側冑子墀頭禮也詢問其地取人不
爭砥柱東橫汾河西澍青臺鎮北監池臨南率尔埏頭
卜擇安居雖則天長地久而恐代異時移陵谷改遷斯
文不謬其詞曰

緇門積疊寶樹崩摧法消蓮坐魂滋夜臺條山陰麓巋

然堦頭碧巖引吹清澗繞流和上登兮舊賞功匠興兮
今修建崇塔兮數仞墜金骨兮千秋

按碑云絳州夏縣平原人也唐書地理志夏縣本
隸虞州貞觀十七年隸絳州大足元年屬陝州尋
還隸絳州乾元三年復屬陝州此碑刻於乾元元
年其時夏縣尚屬絳州也平原者地理志絳州絳
郡注云有府三十三其一曰平原碑又云遷于條
山之側條山卽中條山也在虞州解縣元和郡縣
志山在解縣南二十里縣東十里有鹽池碑又云
鹽池臨南者是也

通微道訣碑

碑高七尺三寸廣四尺十四行行三十二字後
重刻記四行行四十餘字行書在三原大化觀

一御製

人者道之子道者人之母子不知母謂之不孝人不識
道請之至愚故上士能勤行下士唯大笑背道求道從
迷至迷且魚在水中水爲魚命人在道中道爲人生道
去則人亡水竭則魚困不知卽身以求道而乃徇福以
喪真何其誤歟遂積不義之財以爲布施棄無爲之教
別云修善豈知善本破惡不合邀名施本濟人不合求
報哉求道者以心爲舟以信爲車車用在於運舟用在

於虛常取不足勿求有餘靜心而不繫者虛舟也運動而不倦者信車也今將告爾以麤言之首施勿求福而福自至齋勿貪功而功自備心勿向邪而道自致施而求福福必不足齋而貪功是謂有欲向邪求道是謂龔俗忠者臣之分孝者子之心柔弱爲趨道之津誠敬乃入真之馭不益已不損物以不貪爲寶以知足爲富內保慈儉外能和同念身何來從道而有少私寡欲夷心註麤若然者可謂勤行之士爾其勗哉爾其勗哉夫大道坦坦生身不遠修之於身其德乃真爾當填汝身洗汝心內養五神外合一氣去萬惡增萬善長生久視汝

浴麤波真經之旨畢於是不死之方盡於是爾其勗哉

大唐乾元二年六月十五日於大同殿奉 詔賜道

訣碑乃唐 明皇御製文舊碑卽 肅宗皇帝勅道

士達觀大師楊重彎於渭北 大化觀立石者示有

忌也奈歲久缺裂字句不完讀者疑難故補上此石

新舊兩存使觀者見口明理自有所得而不失正路

學者可從此入其於教也豈小補哉亦見古之聖王

急於救物之心深矣遠矣修習之士不口不知戊午

歲人日本觀住持楊思聰謹記

知大化觀事毛致靜重立石 李志口 蒲志常鑿

庫主田志秀

右通微道訣七十五句前云御製後云大唐乾元二年六月十五日于大同殿奉誥賜無書人姓名按訣為明皇製碑為肅宗敕道士達觀大師楊重巒于渭北大化觀立石歲久字泐知觀楊思聰補上此石訣語皆五千言之糟粕演而成訣耳王者寡欲清心納身軌物自然清明在躬志氣如神安用孜孜于真經之旨不死之方也哉

金石錄補

按原碑立于乾元二年歲久缺裂戊午歲人日知大化觀事毛致靜重刻楊思聰記不言何代之戊

午關中金石記以為元時當必有據是仁宗延祐五年也

縉雲縣城隍廟記

一碑高五尺七寸廣三尺七分八行行十一字篆書在縉雲縣

城隍神祀神靈之居也其神之神也
尚祀早疾疫以祀焉其神之神也
二季燥七月而雨八月而雨
雲縣令李陽然祀于祠與祀
亦雨合境吉足具官與者重

金石錄卷之十一
三
東山自西谷遷廟于山巔以答
神休

釋文

城隍神祀典無之吳越有之風俗水旱疾疫必禱焉有
唐乾元二年秋七月不雨八月既望縉雲縣令李陽冰
躬禱于神與神約曰五日不雨將焚其廟及期大雨合
境告足具官與耆耄羣吏人自西谷遷廟于山巔以答
神休

唐乾元中李陽冰嘗宰是邑邑西山之巔有城隍祠
碑刻實所爲記與篆也陽冰以篆冠今古而人爭欲
一得之昨緣寇攘殘缺斷裂殆不可讀偶得紙本於民
間遂命工重勒諸石庶廣其傳亦足以使之不朽也
一 大宋宣和五年歲次癸卯十月朔承信郎就差權處
一 州縉雲縣尉周明 廸功郎就差處州縉雲縣主簿
一 費季文 將仕郎處州縉雲縣丞李良翰 文林郎
一 就差處州縉雲縣令管句勸農公事吳延季 立
一 右城隍神記唐李陽冰撰并書陽冰爲縉雲令遭旱
一 禱雨約以七日不雨將焚其祠旣而雨遂徙廟于西
一 山陽冰所記云城隍神祀典無之吳越有爾然今非
一 止吳越天下皆有而縣則少也

集古錄

陽水篆城隍祈雨碑曰字如日顛上作山李氏三墳
碑敢下作身忘歸堂庶子泉皆石下作曰修廟碑曾
下作甘建字從冫而喜作乙若此類不可以陽水之
蹟尤而效之人字本有刀几二體陽水合之象俯身
曲脛於理則通女字象形陽水曳爲兩足以取稱頰
非象形之初意子字象小兒圓頂鍾鼎至以丁點象
其頭而四布其畫以象手足陽水喜破圓作鉤使正
足二體不分要非子字之正主字象燈之炷陽水或
卧其上炷彘上從彡陽水中畫常正橫作夕死象反
欠彡彘上皆三畫陽水亦謂象人開口作夕然欠象

開口猶可也彘安步也何取於開口乎今篆者于二
字多從水體

熊朋來
經說

李陽冰爲縉雲縣令值旱禱于城隍約五日不雨將
焚其廟及期而雨乃遷廟而記其事書固奇事亦奇
余觀其篆瘦細而偉勁飛動若神歐陽公以爲視陽
冰他篆最瘦余謂佳處正在此又云世言此石與忘
歸臺孔子廟三石俱活歲久漸生刻處幾合故細若
然今去歐公又四五百年寧不爲無字碑乎記云祀
典無城隍神吳越有之至歐陽公云天下皆有縣猶
少今則無縣無之矣且記云自西谷遷廟于山巔又

以見城隍廟前朝不必在城中也今西安府西村落
大者多有城隍是其遺意

石壘
鐫華

五日不雨日字以日為日篆法日从○象形也日古
三切從口含一象口含物也又山宜作凶今作山乃
崑豈等字之頭皆誤

竹雲
題跋

右縉雲縣城隍廟記城隍之神不見于古左傳祝宗
用馬于四鄘又云祈于四鄘杜預以為墉城也城隍
之有祀也其濫觴于斯乎北史慕容儼鎮郢城城中
先有神祠一所俗號城隍神隋書五行志梁武陵王
紀祭城隍神將烹牛忽有赤蛇繞牛口祀城隍神壇

見于此至唐而益盛故張說有祭城隍之文杜子美
詩有賽城隍之句然猶不列于祀典少溫記文可證
也歐陽公跋云今天下皆有而縣則少是宋之城隍
祠又盛于唐而縣猶不皆有祠明洪武初從禮臣之
請加以封爵京都城隍曰昇福明靈王府曰威靈公
州曰靈佑侯縣曰顯佑伯未幾詔去封爵祇稱某處
城隍之神京都歲遣太常寺堂上官行禮諸府州縣
則守令主之而祀典通于天下矣

潛研堂金
石文跋尾

縉雲縣城隍廟碑文唐李陽外撰并篆書碑形上圓
下方後楷書宣和重刻年月立石人官爵姓名下載

一格缺蝕三字微存偏傍可意會也文只八十六字而敘述禱雨遷廟二事義意已足古人作文言簡意該于此可見山農需雨多在盛夏此自七月不雨至八月既望始行禱祀以今日情事較之則亢旱成災已不可支矣豈今昔農事亦遲早異候耶縉雲治當婺女括蒼之交山水奇秀燕坐衙齋如作仙吏余嘗遊其境徘徊不忍去惜匆遽經過未暇搜剔苔蘚一讀遺碑碑作于乾元迨宋宣和禩逾三百而已遭寇攘斷裂宣和至今閱歲倍于前而完好可讀若有鬼神呵護之者

碧溪文集

按城隍二字始于易之城復于隍其後則修治宮室濬繕城隍語見後漢書班固傳六朝以降凡言城隍皆繕治備禦之事唐書百官志職方郎中員外掌地圖城隍鎮戍烽候防人道路之遠近六典祠部郎中員外掌祠祀享祭司中司命風師雨師衆星山林川澤五龍祠等及州縣社稷釋奠爲小祀而皆不及城隍之在祀典據此碑則爲風俗之所尙而亦惟吳越之所有也五代梁初吳越錢鏐嘗于鎮東軍今紹興府卧龍山上重建牆隍廟奏請以故唐右衛將軍總管龐玉爲牆隍神封崇福侯撰

文并勅勒石廟中文見紹興府志及吳越裔孫錢
文瀚所纂吳越錢氏志其稱牆隍者吳任臣十國
春秋曰歐公五代史梁本紀注梁嘗更戊曰武朱
溫父名成戊字類成故改之城之改牆亦此類也
據牆隍廟碑稱吳越重建則在唐時已先有廟而
請封麗玉爲神則始見于錢氏陽冰此碑未嘗云
有人爲神也陽冰兩唐書無傳惟見於宰相世系
表趙郡李氏出自秦司徒曇次子璣裔孫行敦離
狐主簿行敦子懷一晉陽尉懷一子雍門湖城令
雍門子長湜次澥字堅冰刑部侍郎次卽陽冰將

金石作少監宣和書譜稱陽冰字少溫述書賦注云陽

陽冰趙郡人兄弟五人

世系表只三人此疑訛

皆負詞學工于

小篆初師李斯嶧山碑後見仲尼吳季札墓誌便
變化開闔如虎如龍李肇國史補云陽冰自言斯
翁之後直至小生曹喜蔡邕不足言也墨池編云
陽冰雅好書石嘗貽書李大夫願刻石作篆備書
六經立於明堂是曰大唐石經志不克就金石錄
謂陽冰在肅宗朝所書時年尚少故字畫差疎瘦
至大歷以後諸碑皆暮年所篆筆法愈淳勁然則
此碑書于乾元二年尚非暮年淳勁之筆矣陽冰

金石萃編卷九十一
嘗論書勢筆法所禁撰翰林禁經八卷見邵齋讀
書志又推原筆法別其點畫著筆法論見宣和書
譜因史無專傳故詳識之縉雲縣今隸浙江處州
府縣治四面環山不立城郭廟在山巔與在城中
無異石墨鐫華蓋未悉廟之所在也

小篆既而李湛鞫山寧翁見中吳吳季林墓誌與
水鼓傳人只策正人人也張端皆負隨學工于
并少習宣味書譜蘇則水字少監書韻出云

金石萃編卷九十二

賜進士出身 誥授光祿大夫刑部右侍郎加七級王昶撰

唐 五十二

郭氏家廟碑

碑高一丈八寸廣五尺一寸三十行行五
十八字正書今在西安府布政司署中

有唐故中大夫使持節壽州諸軍事壽州刺史上柱國
贈太保郭公廟碑銘 并序

御題額

金紫光祿大夫檢校刑部尚書上柱國魯郡開國公
顏真卿撰并書

昔申伯翰周降神於維嶽仲父匡齊演慶於筮淮而猶
見美詩人騰芳史筭豈比夫神明積高之壤百二懸隔
之都三峯發地而削成九派浮天而噴激炳靈毓粹奔
葉生賢括宇宙而口和摠河山而蘊秀莫與京者其唯
郭宗乎其先蓋出周之虢叔虢或爲郭因而氏焉代爲
太原著姓漢有光祿大夫廣意生孟儒爲馮翊太守子
孫始自太原家焉後轉徙于華山之下故一族今爲華
州鄭縣人夫其築臺見師座子致養家承金穴之賢政
有露冕之高或愬或謀或肅或乂皆海有珠而鳥有鳳
也閎閎之盛其流益光隋有金州司倉諱履球府君懋

其德輝不屑下位克己復禮州邦化焉篤生 唐涼
州司法諱昶府君能世其業以伸其道遠近宗之不隕
厥問生美原縣主簿贈兵部尚書諱通府君清識澈照
博綜羣言始登王畿鬱有佳稱道悠運促靡及賢仕垂
于後昆歿而見尊是生我諱敬之府君府君幼而好仁
長有全德身長八尺二寸行中潔矩聲如洪鐘河日電
照虬鬚蝟磔進退閑雅望之若神以伸由之政事兼翁
歸之文武始自涪州錄事參軍轉瓜州司倉雍北府右
果毅如游擊將軍申王府典軍金谷府折衝兼左衛長
上原州別駕遷扶州刺史未上除左威衛左郎將兼監

金石錄卷九十二
牧南使渭吉二州刺史侍中牛仙客君清節奏授綬
州遷壽州累加中大夫策勳上柱國以天寶三載春正
月十日遘疾終于京師常樂坊之私第春秋七十有八
乾元元年春二月以公之寶靈開府儀同三司司徒兼
中書令柱國汾陽郡王日子儀有大勳于

王室乃下 詔曰故中大夫壽州刺史郭敬之果君
子之行毓達人之德才光文武政美中和生此大賢爲
我良弼頃以夔胡稱亂黔首罹殃朕於是鬱興神武之
師克掃攬搶之氣而子儀師彼勁卒赫然先驅口京洛
如拾遺剪兇殘猶振槁功存社稷澤潤生人是用寵洽

哀榮義申存歿可贈太保於戲府君體含宏之素履秉
冲邈之高烈言必主於忠信行不違於直方清白爲吏
者之師死生敦交友之分端一之操不以夷險槩其懷
堅明之姿不以雪霜易其令用情不間於踈遠泛愛莫
遺於賤貧拳拳服膺終始靡二故所居則化所去見思
人到于今稱之斯不朽矣傳曰德盛必百代祀其有後
也宜哉恭惟令公 先皇之佐命臣也少而美秀

長而瓌偉姿性質直天然孝悌寬仁無比騎射絕倫所
莅以清白見稱居常以經濟自命弱冠以邦鄉之賦驟
膺將帥之舉四擢高第有聲 前朝三爲將軍兼守

大郡累典兵要必聞休績天寶末安祿山反于范陽令
公以節度使擁朔方之衆圍高秀巖于雲中破史思明
于嘉山 先帝之幸朔方赴 行在于靈武擊
同羅于河曲走崔乾祐于蒲坂 今上之爲元帥

也首副旄鉞會迴紇于扶風摧兇寇于汶水退餘孽于
陝服長駟河洛弼成 睿圖再造生靈克清天步又

函夏之未乂安天下之不安一年之間區宇大定丕休
哉徒觀其元和降精間氣生德咸星辰而作輔應期運
以濟時忠於國而孝於家威可畏而儀可像盛德繫物
寬身厚下用人由已從善如流沉謀祕於鬼神精義貫

於天地推赤誠而許國冒白刃以率先霆擊於雲雷之
初鷹揚乎廟堂之上大凡二歷鼎司兩升都座四作元
帥九季中書歷事 三聖而厥德維懋易相二十

而受遇益深蓋剋復上都者再戡定東京者一其餘摩
城擗邑得僇摧鋒亦非遽數之所周也信可謂王國虓
虎生人廕庥者歟非太保之邁種不孤則何以鍾美若
是况乎友于著睦鸞龍虎者十人貽厥有光紆青紫者
八士勲庸舉集今古莫儔昔奮号尊榮紅粟纒寤於萬
石憚家全盛朱輪不出于十人繇我觀之事不侔矣於
乎清廟之興所以仁祖考鴻伐之刻亦以垂子孫爰初

製於舊居將永圖而觀德中唐有恤不構克崇感霜露
而休惕以增叙昭穆而敬恭斯在庶乎觀盥饗若既無
斃於永懷入室儼然必有覲乎其位哀榮既極情禮用
申仁人之所及遠哉孝子之事親終矣豈唯温温孔父
遠稱僂鼎之銘穆穆魯侯獨美龍旂之祀其詞曰

郭之皇祖肇允號土逮于後昆實守左輔徙華陰_其一
源長流光施于司倉涼州兵部克熾而昌載德深_其二
篤生太保允_其三
於穆合公汾陽啟封文經武緯訓徒陟空簡 帝心
_其四
舍一不二格于天地愷悌君子邦之攸懸貊德音

考_其五 芝馥蘭芳羽儀公堂子子孫孫為龍為光鏘璫琳

考_其六 乃立新廟肅雍允劭神保是聽孝思孔昭亶居歆

焉_其七 乃立高碑盛美奚斂日月有既徽猷永垂映來今

考_其八

廣德二年歲次甲辰十一月甲午朔廿一日甲寅建

碑陰

共三十四行分三截書上截男中
截孫下截曾孫字數不等行書

男

昭武校尉守絳州萬泉府折衝都尉上柱國子琇
子儀武舉及第授左衛長上 改河南府城臬府別

將 又改同州興德府右果毅左金吾衛知隊仗長
上 又改汝州魯陽府折衝知右羽林軍長上 又
遷桂州都督府長史充當管經略副使 又改北庭
副都護充四鎮經略副使 又除左威衛中郎將
轉右司禦率兼安西副都護 改右威衛將軍同朔
方節度副使 改定遠城使本軍營田使 又加單
于副大都護東受降城使左廂兵馬使 又拜右金
吾衛將軍兼判單于副都護 又拜左武衛大將軍
兼安北副都護橫塞軍使本軍營田使 又兼充天
德軍使安北副都護 又兼豐州都督西受降城使
右廂兵馬使 改衛尉卿兼單于安北副大都護靈
州刺史攝御史中丞權充朔方節度關內支度營田
塩池押諸蕃部落副大使知節度事六城水運等使
又拜御史大夫餘並如故 又拜兵部尚書同中
書門下平章事兼單于安北副大都護靈州大都督
府長史節度等使餘如故 又特加銀青光祿大夫
又拜司空餘如故 又充副元帥餘如故 又拜
尚書左僕射同平章事兼武部尚書餘如故 又加
朔方管内採訪處置使 又加司徒封代國公食實
封一千戶餘如故 又兼中書令司徒兼靈州大都

督府長史單于鎮北副大都護朔方節度等諸使餘
並如故 又充東京畿及山南東道并河南等道諸
節度防禦兵馬元帥仍權知東京留守判留司尚書
省事餘如故 又兼邠寧鄜坊等兩道節度使 又
封汾陽郡王知朔方河中北庭潞儀澤沁等節度行
營兼興平定國等軍兵馬副元帥仍充本管觀察處
置使餘並如故 加實封五百戶 又加實封二百
戶 又充關內副元帥餘如故 又兼上都留守餘
如故 又兼河東副元帥河中節度本道觀察處置
等使兼河中尹餘如故 又兼靈州大都督單于鎮

北大都護充朔方節度大使及關內支度營田鹽池
押諸蕃部落等使六城水運使管內觀察處置使餘
如故 又拜太尉兼河西副元帥通和吐蕃等使餘
如故 又拜尚書令兼中書令餘如故
游擊將軍左武衛將軍上柱國子雲
朝議郎行延州都督府法曹叅軍子瑛
朝議郎行衢州盈川縣尉子珪
銀青光祿大夫衛尉卿單于副都護振武軍使朔方
左廂兵馬使上柱國幼賢贈太子少保
正議大夫光祿少卿兼漢州別駕賜紫金魚袋上柱

國幼儒

銀青光祿大夫太府卿上柱國太原郡開國公幼明

銀青光祿大夫試鴻臚卿上柱國幼沖

孫

銀青光祿大夫試太常卿上柱國太原縣開國公曜

朝議郎守通州別駕騎都尉賜緋魚袋暄

特進兼鴻臚卿贈開府荊州大都督上柱國旰

雲麾將軍守左武衛大將軍同正上柱國昕

特進試鴻臚卿兼御史大夫左散騎常侍上柱國太

原縣開國公晞

正議大夫試光祿卿贈開府太常卿清源縣開國男

晙

銀青光祿大夫行少府少監樂平縣開國男晤

宣德郎試太子中舍人賞緋魚袋昉

銀青光祿大夫試殿中監駙馬都尉廣陽縣開國男

曖尙

昇平公主

奉義郎試太常寺協律郎晉陽縣開國男現

宣德郎試左衛率府兵曹參軍曉

銀青光祿大夫試祕書監太原縣開國男曙

宣德郎行京北府參軍太原縣開國男昉

朝散大夫試祕書著作郎壽陽縣開國男映

朝請郎試太常寺協律郎晁

曾孫

通直郎行將作丞銳

朝請郎守太府少卿銑

朝請郎守國子監主簿鋒

碑在今陝西布政司御題額顏魯公撰并書敬之汾

陽忠武王父也夫以汾陽家廟得魯公手書千載而

下猶有生氣其文與書又非所論也但其碑在役人

雜遝之所雖歸然壁上而不無磨蝕之憂然以二公

之靈鬼神呵護有由來矣 碑陰具述汾陽兄弟子

孫始知汾陽兄弟九人皆列大位不止史所稱幼明

一人而已且汾陽封拜與史小異錄具左方碑正書

陰作行書不審亦出魯公否觀其筆力似非魯公不

能也 史稱子儀初授左衛長史累遷單于副都護

振遠軍使又以天德軍使兼九原太守又衛衛尉卿

靈武郡太守又加實戶七百頗與碑不合碑立于廣

德二年十一月子儀是時年六十八歲官止于尚書

令兼中書令故不及攝冢宰尊尚父等事但史言子

儀辭尚書令碑乃實書之且通鑑拜尚書令在十二

月此前一月書當是誤

石墨
鐫華

右郭敬之廟碑陰記汾陽初授左衛長上改官封拜至尚書令兼中書令凡二十四考序次歷歷本傳初授左衛長史而非長上或云累遷或云又兼多略而不錄碑記實封二次止四百戶本傳則七百戶碑云拜尚書令在廣德二年十一月而傳云辭尚書令在十二月宜以碑爲信

金石錄補

予從郭氏寵命錄抄當日碑有所未載者世次於後汾陽有大勲於唐室宜其後之以熾而昌也肝子儀欠子晞子儀三子兵部尚書封趙國公曖子儀六子

卒贈尚書左僕射以女爲憲宗后穆宗太后復贈太尉曙子儀七子先金吾大將軍率封沂國公昕子儀姪幼明之子安西大都護四鎮節度使文子儀姪郭太后叔父封鄭國公曜太子太傅謚曰孝郭太后穆宗母憲宗后也爲曖尙代宗長女昇平長公主之女追贈曾祖太保追封岐國公敬之贈太傅父曖爲太尉母號國長公主爲高國太長公主釗曖之子工部尚書劍南西川節度入爲太常卿檢校司徒郭太后兄也縱金吾大將軍卒贈尚書左僕射尙順宗長女漢陽公主饒太子詹事仲恭尙穆宗第四女金堂公

主銀青光祿大夫仲詞尚穆宗第六女饒陽公主釗
之第三子也銀青光祿大夫襲封太原郡公仲文殿
中少監以上抄忠武王陪葬肅宗建陵陵內陪葬
王一人在武將山與太宗九嶼山昭陵相連而稍西北何以無
墓碑或經後人埋沒未可知也郭氏子孫今尚盛住
居華下華州之東路旁有郭汾陽故里石碑此地山
川亦極秀麗集古錄有忠武王將左略碑云貞元十
二年陳翊撰翊之所書亦為盛矣猶言得其六七蓋
其官至宰相者七人為節度使者二十八人尚書丞
郎京尹者十人為察使者五人據翊所得而書者實

六十人而顯名於世者蓋五十人雖喬琳周智光李
懷光僕固懷恩等陷於禍敗然杜鴻漸黃裳李光弼
光進之徒偉然名見於當時而垂稱於後世者亦為
不少豈惟得失相當而已哉雖汾陽功業士多喜附
以成名然其亦自有以得之也其忠信之厚固出其
天性至於處富貴保名德古人之所難者謀謨之際
宜亦得其助也來齋金石
刻考略此碑書於代宗廣德二年十一月正與論坐書同時
是時公年五十六正月除檢校刑部尚書兼御史大
夫朔方行營汾晉等六州宣慰使宰相元載與公不



協恐公因使奏對必言其短等罷前命但以公檢按
刑部尙書置之閒散故得從容翰墨而爲此碑常時
以魯公自書告雍容朗暢不類魯公平生風格爲其
晚歲極深到之作今觀此碑與自書告畧同而朗暢
處更出自書告上直使人不復思自書告矣碑陰雖
無魯公欸然决知亦是魯公書公旣已大書其前誰
敢更續貂其後故趙德甫金石錄斷然曰爲魯公書
書雖非公經意之作然卽此尙可函蓋徐季海張少
梯等數十輩豈直正碑爲足高出一切而已 太保
卒於元宗天寶三載時令公甫從戎功名未盛後十
餘年令公屢立奇勲再造王室至德二年以功加司
徒封代國公明年二月始有追贈太保之命又七年
當代宗廣德二年令公始爲太保立廟當是時僕固
懷恩引迴紇深入天子幸陝避狄令公方雪涕勤王
刻無寧畧乃萬端拮据中猶能以其舊居爲父立廟
忠孝之盛顛沛不忘於戲豈非人倫經紀也歟舊史
書太保追封祁國公此碑不書恐是史誤 碑陰書
令公歷官與新舊兩史皆同但史略而碑詳耳又史
稱八子七壻皆爲朝廷重臣而不知令公兄弟九人
亦皆貴也碑曰友于著睦轡龍虎者十人言兄弟也

兄弟止九而云十者舉成數也貽厥有光紆青紫者
八士言子孫也令公子姪凡十五人而但云八碑以
令公爲主故但言令公之子也 碑立于廣德二年
故書令公歷官止於尙書令按史是年十一月帝以
子儀爲尙書令子儀以太宗嘗爲此官屢表堅辭答
詔有無待禮成曲從德讓之語則已允其辭矣旣允
其辭不宜復書而碑陰有又拜尙書令之語此碑立
於十一月當拜命之時詔允辭讓在其後歟 天以
郭氏再造唐室靈粹之氣鍾於一門豈惟令公秉仁
蹈義始終爲社稷純臣卽其子孫無不世世忠孝自

古名臣往往無後獨令公子孫無復遺議史稱令公
子八人壻七人皆朝廷重臣猶淺之乎知公者矣虛舟

跋題

公名敬之漢光祿大夫廣意之後廣意世系表作廣
智碑載子儀官爵甚詳大略與史傳合史稱振遠軍
使卽單于副都護九原太守卽兼豐州都督也又通
鑑稱是年十二月拜尙書令此碑建于十一月卽稱
尙書令者應是碑陰後書及之也傳稱武舉及第授
左衛長史應依碑作長上碑載子儀兄弟七人孫十
五人曾孫三人孫除子儀子八人外隄是子琇子斯

煦暉幼明子昉曉幼賢子覲子瑛子曾孫銳是曜子

銳是映子

關中金
石記

郭太保敬之乃汾陽王之父碑在今陝西布政司下
庫相傳布政司卽汾陽府第下庫卽家廟舊基也碑
雖漫漶然猶當在顏氏家廟上若碑陰則斷非魯公
書趙子函之言不足信也

鐵函齋
書跋

碑列其上世云漢有光祿大夫廣意生孟儒爲馮翊
太守又云隨有金州司倉履球府君舊唐書地理志
金州隨西城郡武德元年改爲金州是隨不名金州
而文亦遷就爲之也下文篤生唐涼州司法諱昶府

君生美原縣主簿贈兵部尙書諱通府君今案新唐
書宰相世系表廣意作廣智昶作隨涼州法曹亦非
金州司倉而通作美原尉尤不言主簿碑在當世魯
公自所書宜爲有據而表或誤也碑載敬之遷扶州
刺史又渭吉二州刺史又授綏州遷壽州據表所書
敬之吉渭壽綏憲五州刺史與碑歷官數亦合而其
地獨不載扶州又別書一憲州攷元和郡縣志憲州
無文新唐書地理志始有之其小注云憲州本樓煩
監牧嵐州刺史領之貞元十五年別置監牧使龍紀
元年李克用表置州舊唐書志作貞觀十五年楊

爲監牧使下又云龍紀元年特置憲州于樓煩監則
憲州蓋起於唐末故元和志不載而當敬之時州尙
未設何以云爲刺史由是言之知表亦誤也今碑所
云扶州者當依以爲正授堂金石跋
碑陰正書無書人名氏載敬之子孫曾孫凡三世石
墨鐫華跋此碑獨詳子儀歷官於本傳爲備子更以
新唐書宰相世系表校之表載子琇失其官勲今碑
第一層首列男昭武校尉守絳州萬泉府折衝都尉
上柱國卽子琇也表載子雲左領軍將軍碑列游擊
將軍左武衛將軍上柱國表載子瑛延州司法叅軍

碑列朝議郎行延州都督府法曹叅軍表載子珪無
官勲碑列朝議郎行衢州盈川縣尉表載幼賢副都
護碑列銀青光祿大夫衛尉卿單于副都護振武軍
使朔方左廂兵馬使上柱國贈太子少保表載幼儒
成都少尹碑列正議大夫光祿少卿兼漢州別駕賜
紫金魚袋上柱國表載幼明少府監太原公碑列銀
青光祿大夫太府卿上柱國太原郡開國公表載幼
冲太子詹事碑列銀青光祿大夫試鴻臚卿上柱國
又表於子雲下載子暉幼冲下載幼謙而碑無之第
二層列諸孫首爲曜銀青光祿大夫試太常卿上柱

國太原縣開國公載表太子少保太原孝公次朝議
郎守通州別駕騎都尉賜緋魚袋暉表載暉無官勳
次特進兼鴻臚卿贈開府荊州大都督上柱國肝表
載鴻臚卿同正次雲麾將軍守左武衛大將軍同正
上柱國昕表載檢校左僕射磧西節度次特進試鴻
臚卿兼御史大夫左散騎常侍上柱國太原縣開國
公晞表載工部尚書次正議大夫試光祿卿贈開府
太常卿清源縣開國男臚表載試鴻臚卿次銀青光
祿大夫行少府少監樂平縣開國男晤表載兵部郎
中次宣德郎試太子中舍人賞緋魚袋昉表載試太
子中舍次銀青光祿大夫試殿中監駙馬都尉廣陽
縣開國男曖尙昇平公主表載左散騎常侍駙馬都
尉次奉義郎試太常寺協律郎晉陽縣開國男晁表
亦載試協律郎晉陽男次宣德郎試左衛率府兵曹
叅軍曉表亦載試左衛率府兵曹叅軍次銀青光祿
大夫試秘書監太原縣開國男曙表載右金吾將軍
祁國公次宣德郎行京北府叅軍太原縣開國男昉
表載鴻臚少卿次朝散大夫試秘書著作郎壽陽縣
開國男映表載右庶子壽陽尹次朝請郎試太常寺
協律郎暉表不列官勳第三層碑列曾孫僅三人通

直郎行將作丞銳朝請郎守太府少卿銑朝請郎守
國子監主簿名已殘剝表載銳嘉王府長史銑試太
常主簿凡此互爲詳略實足以佐証史表而壽陽尹
唐於縣官不稱尹表誤記也子琇子一人暉子英子
一人現至如昉曉爲幼賢子煦暉爲幼明子昕爲子
雲子餘皆汾陽王子也

授堂金
石跋

按此碑今在陝西省城布政使司署下庫司署在
西安府城東鐘樓西陝西通志云相傳爲秦穆公
故府唐爲尙書省一爲于志寧郭汾陽宅鐵函齋
跋云司署卽汾陽府第下庫卽家廟舊基也然攷

之長安志尙書省在皇城承天門街之東面第四
橫街之北尙父汾陽郡王郭子儀宅在京城丹鳳
門街南親仁坊是尙書省與汾陽宅有皇城京城
之別不可謂尙書省卽汾陽宅也至于志寧宅與
汾陽宅相連則長安志原云于宅在郭宅之西也
長安志于親仁坊載汾陽宅于大通坊載汾陽園
而總不云有郭氏家廟則宋氏略也家廟之制唐
書禮志云諸臣之享其親廟室服器之數視其品
開元十二年著令一品二品四廟三品三廟五品
二廟嫡士一廟庶人祭于寢天寶十載京官正員

四品清望及四品五品清官聽立廟勿限兼節廟
制三品以上九架厦兩旁又三品以上有神主又
五品以上有几筵此皆唐時家廟之制也据此碑
乃汾陽爲其父立廟不在四廟之例而碑文亦專
叙其父太尉之事蹟及汾陽勲業文云勛製于舊
居永圖而觀德殆卽親仁坊宅爲廟而以太尉爲
始祖也碑叙郭氏先世云號或爲郭因而氏焉代
爲太原著姓漢有孟儒爲馮翊太守子孫家焉後
轉徙華山今爲華州鄭縣人宰相世系表郭氏武
王封號叔于西號後平王東遷奪號叔地與鄭武

公楚莊王伐周責王滅號於是求號叔裔孫封于

陽曲號曰郭公號謂之郭聲之轉也因以爲氏華

陰郭氏出自太原漢有郭亭亭曾孫廣智晉公文
集作廣

德碑作
廣意廣智生孟儒子孫遂徙馮翊語與碑合而

較詳也下叙曾祖祖父皆稱諱而加府君二字與

他碑不同碑云履球官金州司倉表云金州司倉

叅軍碑云昶涼州司法表云隋涼州法曹碑云諱

敬之府君不著其字表云敬之字敬之新唐書郭

子儀傳不叙其父舊傳則云父敬之歷綏渭桂壽

泗表作吉渭壽綏憲
碑作扶渭吉綏壽五州刺史以子儀貴贈太保

追封祁國公碑不書此封皆碑與表傳之互異也稱子

儀為公之寶允此二字乃賢嗣令子之別稱始見

于此其碑叙子儀戰功與史傳參校之傳詳而事

皆合傳云廣德二年十一月以子儀為尚書令上

表懇辭答詔不允勅子儀於尚書省視事子儀復

上表詔荅曲從德讓遣內侍魚朝恩傳詔賜美人

盧氏等六人從者八人并車服帷帳牀蓐珍玩之

具蓋家廟之作正在此時也子儀以建中二年薨

年八十五此時年六十八矣据傳所載似子儀之

得從容安居者僅此數月至明年為永泰元年五

月以後遂有出鎮河中之命矣碑陰載諸孫官位

不獨與表異且有與傳異者今以舊書子儀傳參

校之如長子曜碑云銀青光祿大夫試太常卿上

柱國太原縣開國公傳云累遷至太子賓客此下

中時官新傳云至德初推子儀功授衛尉卿累進太子詹事太原郡公三子晞碑云

特進試鴻臚卿兼御史大夫左散騎常侍上柱國

太原縣開國公傳云初以戰功授左贊善大夫加

銀青光祿大夫鴻臚卿拜殿中丞廣德二年加御

史中丞領朔方軍破蕃軍戰捷加御史大夫子儀

固讓此下是永泰二年官新傳同六子曖碑云銀青光祿大夫

試殿中監駙馬都尉廣陽縣開國男尚昇平公主

傳但云年十餘歲尙代宗第四女昇平公主此下是大

歷中事新傳云曖字曖以太常主簿尙昇平公主拜駙馬都尉試殿中監封清源縣侯

云銀青光祿大夫試祕書監太原縣開國男傳但

云代宗朝累歷司農卿此下是建中時事子儀弟幼

明碑云銀青光祿大夫太府卿上柱國太原郡開

國公傳但云以子儀勲業累歷大卿監此下是大

幼明子昕碑云雲麾將軍守左武衛大將軍同正

上柱國傳但云肅宗末爲四鎮畱後此下是建中時事以上

新傳碑所載曾孫三人惟鋒見新史子儀傳銳銑

俱不載而舊傳所有者曜男鉉新傳有昭男鐸

男鋼鈞曖子釗新傳增皆碑所未書又以世

系表校之敬之之子十一人碑所未書者子雲之

弟子喟幼冲之弟幼謙孫二十六人碑僅書十五

人曾孫三十一人碑僅書三人其書于碑者官位

又多不同大抵傳載多在立碑以後不能盡合也

長安志載家廟甚多而家廟之有碑獨始見於郭

氏碑陰書歷官之詳亦未有如子儀者史傳所不

能備也碑銘八章章各五句上四句各自用韻下

一句則合八章之末句同一韻又銘詞之變格也

李光弼碑

碑連額高一丈三尺四寸廣五尺一寸一分四十行
行八十二三字不等額題大唐太尉兼侍中臨淮武
穆王贈太保李公神道碑
二十字並行書在富平縣

唐故□□儀同三司□□□□河南副元帥都督河

南淮南淮西□南山南東道□節度行營事□□□□

上柱國贈太保□□武穆王李公神道碑 并序

金紫光祿大夫檢校刑部尙書上柱國魯郡開國公

顏真卿撰

□中大夫□□□少□上柱國□紫金魚袋張少悌

書

昔宗周之中興也時則有若方叔召虎

□□□□□之

業南威荆蠻東截淮浦

以左右

宣王詩人歌之列在風

雅

我皇唐之反正也時則有若臨淮汾陽兼文

武忠義

之姿

廓清河朔保

人王室

以翼戴

三聖

天下之人

謂之李郭異代

同德

今古一時公諱光

弼京兆萬年人也曾祖

皇左威衛大將軍幽州

畧軍副使府君諱令節祖鴻臚卿兼檀

州刺史府

君諱

重英父雲麾將軍

左

領左羽林二軍大將軍朔方節度

副使薊郡開國

公贈幽州都督司空諱楷洛

皆以英果

沈勇累葉將

邊

威稜於幽碣公即

薊

公之第 四子

也體混元之正性秉宏毅之高躅天子純報生知禮度

謨謀炳邃默識冲深傑出經武之才鬱為興王之佐故

能東征北伐厭難康屯挺草昧不世之功允蒼生具瞻

之望社稷威寶公之謂歟初天后萬歲

中大將軍燕國公武惜固為國大將威震北陲有女曰

今韓國太夫人才淑冠族嘗鑒之曰爾後必生公侯之

子因擇薊公配焉後果生公公年六歲嘗撫鹿而遊薊

公視而誨之曰兒勿更爾公振手而起遂絕不為童戲

未冠以將門子工於騎射能讀左氏春秋兼該太史公

班固之學開元中起家左衛左郎將歷豐夏二都督府

長史尋遷別駕加朝散大夫丁父憂以毀聞終喪不入

妻室太夫人高明整肅有慈有威公下氣怡聲承順而

每竭其力雖已官達小不如意猶加譙讓之責故能濟

其勲業天寶二年拜寧朔郡太守四載加左清道率兼

安北都護仍充朔方行軍都虞候五載充王忠嗣河西

節度兵馬使加游騎將軍守右領軍賜紫金魚袋仍充

赤水軍使八月襲封剌郡開國公八載遷右金吾衛將

軍充節度副使以破吐蕃及招討吐谷渾加雲麾將軍

左武衛大將軍十一載拜單于副都護十三載為安思

順朔方節度兵馬使思順慕公信義請為婚姻公辭不

獲免遂託疾罷官西平王哥舒翰聞而韃之奏歸京師

遂守道屏居杜絕人事十四載冬十一月安祿山反范

陽天下騷朝廷旰食聿求虓獍之將爰統鷹

揚之師明年春正月起公為銀青光祿大夫鴻臚卿兼

雲中郡太守攝御史中丞持節充河東節度支度營田

副大使知節度事仍充大同軍使二月拜攝御史大夫

魏郡太守充河北道採訪使俄除范陽郡大都督府長

史充范陽節度使初公以朔方馬步八千人出土門其

月既望收常山郡前是太守顏杲卿泉長史表履謙口

祿山土門使季欽湊擒其心腹高邈口丁口口口口口

口口口口出救口口履謙口史思明所口戰士口口

口口口口泮池之上公口口口口口口口口口口口

口以祭之分遣恤其家屬城中莫不感激一心史思明

正圍饒陽馳來拒戰公屢摧陷之詔拜公兼御

史大夫命尙書令汾陽王郭公子儀悉朔方之眾與

公合勢口收趙郡又敗之于沙河夏六月戰于嘉山大

敗之斬獲萬計思明露髮跣足于博陵窮蹙無計歸

節於祿山祿山大恐逆徒幾潰屬潼關不守肅

宗理兵于靈武盡追朔方之師加公太原尹公以麾下

及景城河間之卒數千人至秋八月拜戶部尙書同中

書門下平章事史思明既有河北之地與蔡希德悉眾

來攻累月不尅而退公自賊逼城於東南角張帳次居

止竟不省視妻子每過府門未嘗回顧是後決遣事務

信宿方歸至德二年拜司徒冬十二月十五日

肅宗既還京師策勳換司空兼兵部尙書封鄭國公食

實封八百戶公弟光進亦以懋功同制封拜乾

元元年八月拜侍中其年冬十月與九節度圍安慶緒

於相州明年春三月史思明至滏陽屢絕我糧道眾咸

請公簡精銳以擊之交鋒竟日思明奔北于百里之外

公反旆而歸烟塵亘天諸將皆以爲賊軍大至遂南渡

黃河公至則無見矣迺歸于太原是年夏五月除范陽

節度使尋代汾陽王爲朔方節度使秋八月充天下兵

馬副元帥以數千騎東巡追兵馬使張用濟會于汜水

用濟獨來上謁公數其罪而斬之因追都知兵馬使御

史大夫僕固懷恩懷恩中夜馳赴魚貫而前再宿遂至

秋毫不犯公趣河而東及滑州聞史思明已過河遂迎

强旅以至東京移陳留守及官吏等悉皆口避公獨與

麾下趣河陽橋城賊先鋒已下倒愁坂公至石橋命秉

燭徐行一夜方達賊望之不敢近思明來至城下請見

公公於城上謂之曰我三代無葬地一身必以死國家

之患爾為逆虜我為王臣義不兩全我若不死于汝手

汝必死於我手將士聞之無不激勵相持凡八月思明

暴露不敢入東京乾元二年冬十月甲申賊將周智悉

河北之眾萃于河陽城北思明以河南之眾頓于河陽

南城之南南北夾攻表裏受敵公設奇分銳襲其虛而

大破贊軍臨陣擒其大將徐口口殺獲略盡贊僅以身

免收軍資器械不可勝數思明心悸氣索烟火不舉者

三日官軍大振初公以為戰者危事勝負難必每臨陣

嘗貯伏突於中義不受口至口登城西向拜辭因獻

欵不自勝三軍見之無不淚下三年春正月口太口兼

中書令口口口口上元口口口月攻拔懷州擒其偽節

度安太清二年春二月統僕固懷恩自河陽趨河清與

思明合戰于邙山屬風雨晦冥王師不利公收合餘軍

屯于垣縣遂引過請罪懇讓太尉肅宗不能違

之二月并開府儀同三司中書令兼河中尹節度使夏

五月十有一日復并太尉兼侍中充河南副元帥都知

河南淮南淮西山南東荆南五道節度行營事出鎮臨

淮時史朝義乘邙山之捷圍逼申安等一十三州自領

精騎圍李岑於宋州公之將吏皆兇懼議南保揚州公

謂之曰臨淮城池卑陋不堪鎮遏不如徑赴彭城俟其

谷于王母虔寔公于富平縣先塋之東禮也於戲公以

吉甫文武之姿兼樊仲將明之德王國多難羣胡搆紛

藉朔方偏師之旅入井陘不測之地思明挫銳於恒定

祿山絕望於江淮守太原而地道設奇保河陽而雲梯

罔冀破周贄於溫沈擒太清於覃懷走史朝義叛渙之

眾於梁宋救僕固瑒已危之軍於瀛莫皆意出事外虜

墜計中□□□□□□□□家無贅旒之患此皆公之

力也公兄遵宜遵行仕至將軍泉弟光響立不幸早世

次曰光顏特進鴻臚卿皆有將畧見稱時輩季曰光進

□□□□□□□□太子太保兼御史大夫渭北節度使涼

國公清識表微沈謀絕衆剛亦不吐柔而能立與公並

時仗鉞分闕□□凌霄翼聖既有戴天之功華原統師

獨聞禁暴之德□□會同□至□□□□□□□□□□

□□□□□□泰階之上歸聯綵服頌雙節於高堂之

□□□□□□何居□□□□□□□□□□州□□□□

□北齊拔□□□□□□□□州亦宣力於西魏咸稱義

烈各懋動庸而□□□□□□隅隘陘比之我族事則不

侔真卿昔守平原□□□□繫公蒞止獲保餘生束帶

興居空想北平之禮操□□撰敢墜中郎之辭銘曰

羯胡猖狂倣擾皇綱降生臨淮佐我興

王維此臨淮萬夫之望愛初發迹罔或弗臧出入忠孝

人倫激昂其心鐵石其行圭璋天寶未造河朔匪攘

天子命公經營朔方沙河嘉山我伐用張思明歸

節祿山霍惶潼關勿口醜虜其亡肅宗有命大

鹵于襄應變如神兇徒靡亢介珪入覲台座用光俾公

東征北國是皇長圖鄴下望入河陽擒斬渠魁霆擊龍

驤淮濱鎮定徐土翺翺服田夔屈料場鷹揚不有神算

疇戡暴强弟兄同時秉鉞煌煌方期凱旋雙映旂常晨

趨法座夕慶高堂如何不辰愆此百祥素輶反葬白驥

跼箱簫鼓悲鳴羽儀分行萬乘致祭于官送喪生榮死

哀身歿名揚渭水川上壇山路旁唯餘豐碑突兀連隔

往來必拜萬古沾裳

關西道耀州富平縣李光弼墓在縣西四十里顏魯

公為碑太平寰宇記

張少悌書在當時不大知名而此碑殊勁拔清圓深

得右軍行草遺意惜殘缺不完且于李公中興偉畧

不得一一證之唐史耳石罍鐫華

右李光弼碑顏真卿撰張少悌書按史光弼營州柳

城人父楷洛為契丹酋長武后時入朝而碑云京兆

萬年人父楷洛蒞郡開國公未嘗言契丹酋長也地

理志柳城郡于萬歲通天元年爲契丹所陷開元五年還治大都督府楷洛于武后時人朝柳城陷未久不應卽爲酋長旣陷後又安得入朝也或以入朝後附籍京兆而酋長之說魯公爲臨淮諱故并其舊籍而逸之耶史云楷洛贈營州都督謚忠烈碑云贈幽州都督而無諡又云兄遵直遵沂弟光琰光彥光進子義忠策而史但稱光進與策詳貴也夫臨淮雖與汾陽齊名戰功尤爲中興第一如斬侍御史崔衆賞郝廷玉之神將援矛者壁野水度還軍以避李白越之劫其胆識出諸將上碑皆略之顏公筆弱不能如

司馬子長韓彭諸將傳使千載下鬚眉如見也

金石後錄

按此碑間段缺泐賴顏魯公集刻此文可以校補碑無立石年月文云廣德□年□七月五日己亥薨而年上泐一字顏集作二年據通鑑目錄是年七月丙申朔則己亥是四日非五日然推其前五日爲丁酉朔若五月小盡則六月爲丙寅朔再小盡七月爲乙未朔五日正是己亥與碑合或通鑑有誤文也則碑當立于廣德二年與魯公集合矣新唐書稱光弼營州柳城人碑作京兆萬年人宰相世系表云柳城李氏本奚族不知何氏至寶臣

爲張鑣高養子冒姓張氏後賜姓李氏表末云李氏三公七人三師二人柳城李氏有光弼而于表內不書光弼名且碑所載曾祖令節祖重英父楷洛皆不在表內所未詳也光弼傳不載曾祖祖惟云父楷洛本契丹酋長武后時入朝累官左羽林大將軍封薊郡公吐番寇清源楷洛率精兵擊走之初行謂人曰賊平吾不歸矣師還率于軍贈營州都督謚曰忠烈所載官位與碑不同然楷洛自契丹入朝則居萬年者卽自光弼始矣傳所叙光弼事蹟大較與碑同其不同者碑云朔方馬步八千人出土門傳作五千人碑云以數千騎東巡追兵馬使張用濟傳云以河東騎五百馳東都碑云賊將周智傳作周摯碑云嘗貯伏突于靴中傳云納刀于靴刀有伏突之名未有所攷碑云圍逼申安等一十三州傳作申光唐書地理志申州義陽郡安州安陸郡光州弋陽郡同屬淮南道不能定其孰是也又傳云浙東賊表晁反台州建元寶勝通鑑與此同宋庠紀元通譜作昇國以建丑月爲正月殘剽州縣光弼遣麾下破其衆于衢州廣德元年遂禽晁浙東平詔增實封戶二千與一子三品階碑但書增戶

二千餘俱不載又傳云吐蕃寇京師代宗詔入援
光弼畏禍遷延不敢行及帝幸陝猶倚以爲重數
存問其母以解嫌疑帝還長安因拜東都留守察
其去就光弼以久須詔書不至歸徐州收租賦爲
解帝令郭子儀自河中輦其母還京二年光弼疾
篤此事碑多泐文魯公刻集又多漫漶賴傳得其
詳也碑不書薨年若干傳云五十七碑稱長子太
僕卿義忠先逝次太府少卿太僕卿象次殿中丞
策等皆保家克荷傳惟載策有志操廉介自將從
賈耽爲裨將奏兼御史大夫

此下是元和
和年事

不云其官

殿中丞也碑云公兄遵宜遵行弟光允皆早世次
曰光顏特進鴻臚卿季光進亦以懋功同制封拜
光進附見光弼傳云字太應初爲房瑄裨將將北
軍戰陳濤斜兵敗犇行在肅宗宥之代宗卽位拜
檢校太子太保封涼國公吐蕃入寇至便橋郭子
儀爲副元帥光進及郭英乂佐之

此下是至
德以後事 傳載

光進官與碑同而碑有兼御史大夫渭北節度使
傳所無也碑云天后萬歲中大將軍燕國公武楷
固爲國大將威震北陲有女曰今韓國太夫人才
淑冠族嘗鑿之曰爾後必生公侯之子因擇薊公

金石錄卷九十二 三
醜焉後果生公是光弼之母武氏也傳則云母李
有鬚數十長五寸許封韓國太夫人是以其母爲
李氏矣疑子爲李氏不應母與同姓史誤顯然碑
云窆公于富平縣先塋之東是其先塋在富平也
傳則云死葬長安南原皆碑傳之互異者碑云真
卿其守平原繫公蒞止獲保餘生以唐書顏真卿
傳證之真卿出爲平原太守安祿山反真卿募勇
士得萬人祿山遣其將李欽湊高邈何千年等守
土門真卿從父兄常山太守杲卿與長史袁履謙
謀殺湊邈擒千年送京師土門旣開十七郡同日
歸順其推真卿爲帥卽碑所云公以朔方馬步八
千人出土門云云語皆合也

金石萃編卷九十三

賜進士出身 誥授光祿大夫刑部右侍郎加七級王昶撰

唐五十三

顏魯公與郭僕射書

石橫廣四尺六分高三尺二分兩截書上截三十二行旁添一行下截三十二行旁添三行每行字數不計草書在西安府學

十一月 日金紫光祿大夫檢校刑部尚書上柱國魯郡開國公顏真卿謹奉書于右僕射定襄郡王郭公閣下蓋太上有立德其次有立功是之謂不朽抑又聞之端揆者百寮之師長諸侯王者人臣之極地今僕射挺

金石錄卷九十三
不朽之功業當人臣之極地豈不以才爲世出功冠一時挫思明跋扈之師抗迴紇無厭之請故得身畫凌煙之閣名藏太室之廷吁足畏也然美則美矣然而終之始難故曰滿而不溢所以長守富也高而不危所以長守貴也可不儆懼乎書曰爾惟弗矜天下莫與汝爭功爾惟不伐天下莫與汝爭能以齊桓公之盛業片言勤王則九合諸侯一匡天下葵丘之會微有振矜而叛者九國故曰行百里者半九十言晚節末路之難也從古至今裒我高祖太宗已來未有行此而不理廢此而不亂者也前者菩提寺行香僕射指麾宰相與兩省臺省已下常參官並爲一行坐魚開府及僕射率諸軍將爲一行坐若一時從權亦猶未可何況積習更行之乎一昨以郭令公父子之軍破犬羊兇逆之衆衆情欣喜恨不頂而戴之是用有興道之會僕射又不悟前失徑率意而指麾不顧班秩之高下不論文武之左右苟以取悅軍容爲心曾不顧百寮之側目亦何異清晝攫全之士哉甚非謂也君子愛人以禮不聞姑息僕射得不深念之乎真卿竊聞軍容之爲人清修梵行深入佛海况乎收東京有殄賊之業守陝城有戴天之功朝野之人所共貴仰豈獨有分于僕射哉加以利衰塗割恬然

於心固不以一毀加怒一敬加喜尚何半席之座咫尺之地能汨其志哉且鄉里上齒宗廟上爵朝廷上位皆有等威以明長幼故得彝倫叙而天下和平也且上自宰相御史大夫兩省五品以上供奉官自爲一行十二衛大將軍次之三師三公令僕少師保傅尚書左右丞侍郎自爲一行九卿三監對之從古以然未嘗參錯至如節度軍將各有本班卿監有卿監之班將軍有將軍之位縱是開府特進並是勲官用蔭卽有高卑會讌合依倫叙豈可裂冠毀冕反易彝倫貴者爲卑所凌尊者爲賤所偪一至於此振古未聞如魚軍容階雖開府官卽監門將軍朝廷列位自有次叙但以功績旣高恩澤莫二出入王命衆人不敢爲比不可令居本位須別示有尊崇只可於宰相師保座南橫安一位如御史臺衆尊知雜事御史別置一榻使百寮共得瞻仰不亦可乎聖皇時開府高力士承恩宣傳亦只如此橫座亦不聞別有禮數亦何必令他失位如李輔國倚承恩澤徑居左右僕射及三公之上令天下疑怪乎古人云益者三友損者三友願僕射與軍容爲直諫之友不願僕射爲軍容佞柔之友

又一昨裴僕射誤欲令左右丞勾當尙書當時輒有訓

金石錄卷九十三
對僕射恃貴張目見尤介衆之中不欲顯過今者興道
之會還爾遂非再獨八座尚書欲令便向下座州縣軍
城之禮亦恐未然朝廷公讌之宜不應若此今既若此
僕射意只應以爲尚書之與僕射若州佐之與縣令乎
若以尚書同於縣令則僕射見尚書令得如上佐事刺
史乎益不然矣今既三廳齊列足明不同刺史且尚書
令與僕射同是二品只按上下之階六曹尚書並正三
品又非隔品致敬之類尚書之事僕射禮數未敢有失
僕射之顧尚書何乃欲同卑吏又據宋書百官志八座
同是第三品隋及國家始升別作二品高自標致誠則
尊崇向下擠排無乃傷甚况再於公堂獨咄常伯當爲
令公初到不欲紛披僂俛就命亦非理屈朝廷紀綱須
共存立過爾隳壞亦恐及身 明天子忽震電含怒責
敦彝倫之人則僕射將何口以對

昨日長安安師文出所藏顏公與定襄郡王書草數
紙比公他書尤爲奇特信手自書動有姿態乃知瓦
注賢于黃金雖公猶未免也

東坡集

魯公與郭令公書論魚軍容坐席凡七紙而長安安
氏兄弟異財時以前四紙作一分後三紙及乞鹿脯
帖作一分以故人間但傳至不願與軍容爲佞柔之

友而止元祐中余在京師始從安師文借得後三紙遂合爲一此書雖奇特猶不及察濠州刺史文之妙蓋一紙半書而真行草法皆備也

黃文憲公集

右唐顏魯公與郭僕射書僕射郭英乂也魯公於座位高下小有失當猶力爭如此使之立朝其肯逢君之惡乎

金石錄

魚朝恩擠郭令公折元載搖相里造侵王縉一時權燄熏灼若此魯公秉義以奮其驕至今幾五百年尚凜凜有生意倚其偉與但其間稱譽朝恩尙數十言大半於行間增入豈猶未免於危行言孫邪

魏了翁鶴山集

魯公作字多擘窠大書端勁而秀偉黃魯直云此所期無不欲高照千載者此帖草略匆匆前所未見開軸未暇熟視已覺粲然忠義之氣橫溢而點畫所至處便自奇勁公嘗謂盧杞曰朝廷法度豈更堪公破壞也于此又曰朝廷綱紀須共存立凜然想見其爲人蓋公所遭之時如此而所守之道不得不然故倉卒未敢忘國之綱紀也余私有感于中者因記于此

石門文字禪

坐位帖真蹟在京兆安氏家嘗刻以傳世吳中復守永興謂安氏石未盡筆法因再模刻此二本余家咸

有之安氏子孫分析坐位帖乃剖爲二此帖至行香
寺僕射指後不復有蓋長安石刻本卓頭高指後別
爲一行遂由是平分爲兩是安氏兄弟不學之謬東
坡見安師文時帖尙全嘗手搨數十本余得坡公搨
本於東平王氏無纖豪失真旁用眉陽蘇氏及趙郡
蘇軾印記米襄陽年少嘗臨之邵伯溫亦云安氏析
後不復見全本此卷筆法絕類米老遂定爲米老所
臨無疑

袁桷清容
居士集

西安府學顏魯公座位帖得之按察使李俊此帖與
北京本字行微有不同處字亦稍剝不若北京本之

精好也北京本云初止二石永樂十一年民家發地
又得二石始爲完物然予所得於洪常秀才者亦四
幅但視此則首缺六行尾缺八行不知其如何也

菜
竹

按元章待訪錄是楮紙用先豐縣先天廣德中牒起
草秃筆今此石刻中秃筆宛然都元敬寓意編謂馬
主事抑之家藏有米臨此帖內有元時袁文清搨跋
謂京兆安氏嘗刻以傳世吳中復守永興以安氏石
未盡筆法因再摹京兆永興皆陝中地名今石在陝
中豈卽安氏原石耶抑永興重摹者耶又謂安氏分

金石錄卷九十二
六
析時剖此帖爲二至僕射指下遂平分爲兩以石刻較之正居其半今此帖共六十九行僕射指處止十九行正得四分之一多二行豈馬所藏本又止半幅耶元章書史又謂內小行是於行間添注不盡又於行下空紙邊橫寫與刻本不同若是米臨本亦當作橫寫乃是何袁跋未見言及此帖首十餘行尙覺屈彊未舒至僕射指以下乃始活潑飛動至皆有等威後又更渾化入妙結末數行筆已倦意已懈而餘興淋漓更出屋漏雨蹟殆若所云懷素自言初不知者若分得後半當是獲膏腴產矣袁跋又云嘗得坡翁

搨本無毫髮失真蘇公見安師文帖時帖尙全嘗手搨數本書遂大進蘇本久不問應已湮沒馬氏藏米本不遠今尙能存否內尊者爲賊所偏當是賤所偏又別置一榻下重使字想皆係原稿誤古人書皆手寫其正本奈何反不傳書畫跋跋

宋沈括夢溪筆談曰都堂及寺觀百官會集坐次多出臨時唐以前故事皆不可考惟顏魯公與左僕射定襄郡王郭英乂書云宰相御史大夫兩省五品供奉官自爲一行十二衛大將軍次之三師三公令僕少師保傅尙書左右丞侍郎自爲一行九卿三監對

之從古以來未嘗參錯此亦畧見當時故事

金石文字記

此魯公與郭英又書英又為尚書右僕射封定襄郡王驕蹇泰侈陰事元載魚朝恩以固其權時郭子儀大破吐蕃於長安朝臣德之為興道之會英又擠八座尚書坐朝恩下公移書糾正之年譜以此書在代宗廣德二年按行狀公以肅宗寶應元年加上柱國廣德元年加金紫光祿大夫是年十月吐蕃寇長安上幸陝州子儀擊却之十二月上還京師以魚朝恩為天下觀軍容使二年正月以公檢校刑部尚書三月進封魯郡開國公觀公自署銜及稱朝恩為軍容

者與年譜正合則知此書正當在廣德二年十一月蓋明年夏劍南節度使嚴武死英又往代之即不復在京矣顧寧人金石文字記不知其年列此書于大歷之後蓋未深考耳 按米氏書史爭坐帖是唐畿縣獄狀礎熟紙起草內小字是於行間添注不盡又與行下空紙邊橫寫與刻本不同石刻龕存梗槩耳又袁清容集爭坐真蹟京兆安師文嘗刻以傳世吳中復再模刻今此二本世未之見所見惟關中刻耳如米氏言行列已非龕存梗槩不知真蹟妙處何如使人神往又不知安氏吳氏所刻比今關中本又何

知或曰今關中本即安氏所刻亦未知其是否也雲竹

跋題

書稱英又挫思明跋扈之師抗回紇無厭之請按新
史史思明陷洛陽謀掠陳蔡詔英又統淮南節度兵
賊叩陝虢又改陝西節度使而不言其破思明之功
及英又留守都史稱其無東檢御才縱麾下與回紇
兵大掠都城並無抗拒回紇之語皆與此書不合當
由失書或稱公作書時不免稍有假借為孔子危行
言遜之義公於名義所關執論侃侃略不假借豈肯
遽於英又安推其功如此定是史者失之耳 三稿

祭姪為先告伯父次之論坐最後祭姪告伯皆在乾
元元年公以三月刺蒲州故九月祭姪稱蒲州刺史
十月改刺饒州故告伯父稱饒州刺史後七年當代
宗廣德二年公乃與定襄有論坐書三稿皆公奇絕
之作祭姪奇古豪宕告伯父淵潤從容至論坐則兼
有祭姪告伯兩稿之奇情緒不同書隨以異所以直
入神品足為蘭亭後勁也 虛舟題跋
舊唐書代宗紀廣德二年十一月丁未郭子儀自涇
陽入覲詔宰相百僚迎之於開遠門上御安福寺待
之此帖所稱興道之會正在其時魯公年譜系之廣

德二年信矣此書前一段言魚朝恩階雖開府官止
 監門將軍以班列言之應序於十二衛大將軍之次
 即欲別示尊崇只可於宰相師保座南橫安一位如
 御史臺知雜御史之例不當列于僕射之上後一段
 言僕射是二品六曹尚書並三品非隔品致敬之類
 不當擠排尚書使在下座所云裴僕射者左僕射裴
 冕也尊者為賊所偏賤誤作賊唐會要尚書左右僕
 射自武德至長安四年以前並是正宰相豆盧欽望
 拜左僕射不言同中書門下三品不敢參議省事數
 日始加知軍國重事至景雲二年韋安石徐左僕射

東都留守不帶同三品自後空除僕射不是宰相遂
 為故事英又除僕射時已非宰相然官品最高在侍
 中中書令之上過此則為三公三師非尋常人臣之
 職故稱百寮之師長也潛研堂金石文跋尾

按爭坐位帖自宋以來摹刻者有七種一曰京兆

安氏刻本長安安師文一曰吳中復重刻本中復守永

興再摹刻見東坡集一曰米襄陽臨本見寶章待訪錄一曰北京本

見清容集一曰戲鴻堂本見畫禪室隨筆一曰嘉善魏氏本

見棗竹堂稿一曰戲鴻堂本見畫禪室隨筆一曰嘉善魏氏本
即半村錢旃摹本嘉善魏學濂正之學濂字子一號內齋忠節公大中子明亡殉難著內齋集十卷日知錄五卷益帖為錢氏手摹魏氏校正一曰關而觀妙齋金石考畧定以為魏氏摹刻

中本

見竹雲題跋

今在西安府學碑林者即關中本也

昶藏本南宋時榻國初為無錫錢陸燦湘靈所

藏字畫端勁湘靈嘗書其生年甲子並科分事實

于下則其實貴可知矣帖中塗抹添注處如謹寓

書改為謹奉書不其盛矣改吁足畏也然美則美

矣宰相一行坐添注與兩省臺省已下常參官等

類字文武之左右添注不論二字苟以悅軍容為心

苟以下添取字竊見聞姑息添注甚非謂也君子

愛人以禮不等字深入佛海字添注況乎收東京

至豈獨有分子僕射哉等字西省官自為一行兩

省下添注五品以上供奉六字十二三師三公十

二下添注衛大將軍次之六字未嘗參錯下添注

至如軍將至振古未聞等字不亦可乎下添注聖

皇時至亦不聞別有禮數等字蓋不然矣下添注

今既三廳齊列足明不同刺史等字此外尚有數

處零星添注不計可見魯公當時雖信筆直書之

中仍委曲詳盡非率意為之也文云奉書于右僕

射定襄郡王郭公新唐書郭知運傳知運次子英

父舊傳作知字元武代宗即位雍王率諸將討賊

洛陽畱英父殿于陝東都平權知畱守以功實封

三百戶舊傳作二百戶召拜尚書右僕射封定襄郡王文
 云魚開府及僕射率諸軍將為一行魚朝恩傳云
 朝恩洛陽平徙屯汴州加開府儀同三司文云郭
 令公以父子之軍破犬羊兇逆之眾郭子儀傳云
 子儀次子晞復兩京戰最力吐蕃回紇入寇擊破
 之文云苟以取悅軍容為心軍容之為人清修梵
 行深入佛海魚朝恩傳九節度圍賊相州以朝恩
 為觀軍容宣慰處置使觀軍容使自朝恩始而不
 言其修梵行殆由當時宮禁尚沿崇佛之舊習朝
 恩亦嘗奉之而史家所宜從略耳文云收東京有

殄賊之業守陝城有戴天之功朝恩傳云史思明
 攻洛陽朝恩以神策兵屯陝洛陽陷思明長驅至
 硤石肅宗詔銳兵十萬循渭而東以濟師朝恩按
 兵陝東使神策將衛伯玉與賊將康文景等戰敗
 之洛陽即此事也攷之史傳多與此帖語合傳稱
 郭英乂陰事宰相元載以久其權而真卿又不為
 元載所容論事坐以誹謗不久即有硤州別駕之
 貶然則英乂得此書其以真卿之之言為是與否
 史無明文皆不可知而既為陰事元載之人則真
 卿之被貶未始非英乂陰為之譖已

白道生碑

碑高七尺一寸廣三尺九寸七分二十
一行行四十字正書篆額在正定府

大唐故左武衛大將軍贈太子賓客白公神道碑銘

序并

朝議郎行尚書禮部員外郎翰林學士賜緋魚袋于

益奉 勅撰

口議大夫行將作口口翰林待 詔上柱國賜紫金

魚袋摯宗奉 勅書并篆額

淳維之地上戴斗極其氣勁悍其人口口間生將才口

我王略其有革去故俗鼎新華口建功惟忠戡難以武

常衽弋革每襟邊陲胙土連華口口襲祉啓迪後嗣光

昭前人可得而言也公諱道生其先呼韓之宗谷蠡之

驪代居南部口入中原漢典論封特命弓高之秩周臣

赴會委書潞子之班祖廣琛雲麾將軍左羽林大將軍

心誓北軍爪牙中壘口道口口門有嚴父崇禮忠武

將軍左金吾衛翊府中郎將職副緹騎名雄鷁冠警於

誰何勤以夙夜公誕自口口于干戈太公之苻如已

神授孫子之要動皆暗合心傾奉國膽略禦邊鎮在疆

場統其蕃部等為寧朔州刺史兼部落主恩附曠俗威

除寇攘軍門罷局虜騎遠遁開元中口安郡口口以宗

室之賢受登壇之寄每有討伐命公先鋒寇必能嘗險

不避難馘黠虜之首繫林胡之俘仍援河湟大破戎醜
 數實過當讓功居多一自捍邊卅餘載終于左衛大將
 軍春秋六十夫積善疇慶嗣績不忘辛口繼封耿門多
 將求之於代公實有焉其子朔方先鋒使同節度副使
 開府儀同三司試太子賓客左武衛大將口口口口
 口口口口口口勇乃絕倫忠而口力九伐之際常為戰鋒
 勞旋策勲議績當最口口口口口口口口口口口口口口
 皇上
 口乃茂功義崇追遠 恩光照於幽口厚澤降于
 重泉贈公太子賓客夫人康氏為口國大夫人喪事官
 俱有加常等以永泰元年三月廿四日遷窆于萬年縣

鳳栖原禮也口口同列千車會送更刊貞石式建豐碑
 同武庫之閒樵蘇永禁比祁連之象丘隴長存銘曰
 地在元朔代生良將名重關西氣雄塞上繼秉金鉞遞
 居玉帳戰必為鋒居常保障粵有令子時高茂勲援戈
 揮日仗劔決雲東平寇孽西掃狄氛志由忠立名以勇
 聞刻茲貞石以表孤墳

永泰元年歲次乙巳三月壬辰朔廿四日甲寅建

清河張渾 魯國栗光刻字

道生系出突厥為寧朔州刺史終于左衛大將軍以
 子元光貴贈太子賓客史但云寧朔州刺史而已碑

金石錄卷之三
十四
題左武衛大將軍而文稱左衛大將軍殊不可解碑
始著于京兆金石錄歐趙諸家俱未載子於京師琉
璃廠市上購得之文尙完好無大漫漶而書法亦道
整可喜

潛研堂金
石文跋尾

道生南陽郡王元光之父官終左衛大將軍追贈太
子賓客夫人康氏爲趙國太夫人唐書元光傳以爲
終寧朔州刺史者非也

關中金
石記

按此碑撰書篆額皆奉勅撰者于益結銜云朝議
郎行尚書禮部員外郎翰林學士新唐書于志寧
傳志寧曾孫休烈烈二子益肅及休烈時相繼

爲翰林學士益天寶初進士第不云其官禮部員
外也傳又稱天子嘉休烈父子著儒行休烈妻韋
卒詔贈國夫人

史不詳
何國

葬給鹵部鼓吹是益以儒

行著也宰相世系表載益官終諫議大夫書碑
額者摯宗兩唐書無傳書譜亦不列其名攷摯
風俗通云摯疇古諸侯國也通志氏族畧或云
摯子摯之後周有摯荒漢有摯綱又後漢有摯恂
晉有摯虞皆最著者宗殆其裔歟碑云公諱道生
其先呼韓之宗谷蠡之允代居南部口入中原呼
韓邪本匈奴單于見漢書匈奴置左右賢王左

谷蠡見史記則道生係突厥之族帳與白氏
帝之後出南陽望者不同系也祖廣琛父崇禮
居右職史皆無傳新唐書道生亦無專傳附見
光弼傳後白元光傳元光卽道生之子也字元光
其先突厥人父道生歷寧朔州刺史而不詳道生
之事蹟碑云開元中口安郡口口以宗室之賢受
登壇之寄每有討伐命公先鋒云云文中泐字以
元宗紀及太宗諸子傳證之乃信安郡王禕也紀
云開元十八年五月己酉奚契丹附于突厥二十
年正月乙卯信安郡王禕爲河東河北道行軍副
元帥以伐奚契丹三月己巳信安郡王禕及奚契
丹戰于薊州敗之傳稱太宗子鬱林王恪恪子琨
進封吳王琨子禕中宗時封嗣江王以繼囂後開
元時亦以傍繼徙信安郡王累遷禮部尙書朔方
節度使契丹可突于叛詔拜忠王爲河北道行軍
元帥討之勅禕以副忠王不行禕率裴耀卿諸將
分道出范陽北擊二蕃破之卽碑所載宗室登壇
之事也碑云其子朔方先鋒使同節度副使開
儀同三司試太子賓客左武衛大將下此叙道
子元光之官也傳稱元光初隸寧朔本軍補節

先鋒安祿山反詔徙朔方兵東討元光領所部結
義營長驅從光弼出土門累遷太子詹事封南陽
郡王爲兩都遊奕使長安平轉衛尉卿兼朔方先
鋒史思明攻河陽光弼召主騎軍其後歷靈武雷
後定遠城使此元光歷官可以補碑之闕也碑云
遷窆于萬年縣鳳栖原長安志無此原名蓋失傳
矣末云永泰元年歲次乙巳三月壬辰朔廿四日
甲寅建壬辰朔則甲寅是廿三非廿四也道生父
子功績官位不甚崇顯遷窆時亦別無特恩不知
何因撰書碑文皆奉勅文無可攷

李寶臣碑

碑高一丈八尺四寸六分廣八尺八寸五分二十五行行五十五字正書

成德軍節度使開府儀同三司檢校尚書右僕射兼御
史大夫恒州刺史充管內支度營田使清河郡王李公
紀功載政頌 并序

支度判官朝散大夫行監察御史王佑上

推勾官朝散大夫行太子司儀郎王士則書并篆

惟天 明命 聖人允成 □□□□□□□□

□□戲 君非臣無以化化臣非 君無以

贊贊明明 君臣品 □□□陰陽載 □□□□□□

□□□□□□歲□□□□□□應 帝嗣位敬統舊
服惠周於下下罔不格冬十一月 我亞相張公忠志
率東諸侯□出復命元元以貞□太和也先是祿□□
亂朋毒中夏□政血□覆忠良殖姦冗蒸人側側不貳
率乃戮 公越在東土受制宇下為侯□恒克□復寧
□□王室誕宣 我化靡□余□敷聞 帝

庭奉若 王命 帝曰休才正侯良才

授恒州刺史封密雲郡公表獻□□越二□□□□
羣海 □□擅□無人薄三川威五長摺紳管管
不自即乃工 公執在厲階登若股上罔拂祇命命我

□□□□□□□□□□□□□□□□德式□庶欲歸於
本朝朝廷嘉茂功錫丕□□禮部尚書兼御史大夫
成德軍節度使清河郡王賜姓李□□□□□□□
□懿□□□□□□□□□□□□司國樞□□□□□草
風俗是 摠朝憲率寧全趙開復東土是用苴白茅昭
崇武功允正□□□□□□□□□□維城宗我□□□
□□□□名銘之景鍾永憲□後 公固讓不獲祗奉
□□□□天之明命惟 祖惟父佐世有勲享祿無及□
□□□□□□□□天□□德□□□邦忠孝剛義□直□
亮家用□□位□宜才初 公牧恒元年為也為師尅



恒恒不堪命羣盜衆聚口野口口口口口口凶極公
口口口口明武殛暴暴服口口人譔不口廬口口口以
晏口口士馴業口口穡工就務商通貨四者各正口口
日用口口口二口口口口吏更告公曰滹沱會流暨
于城下天雨淫降頽湧口口皮積如阜口口乃口口恐
爲魚其日固久公以聚人慾口口口口流口口天
造層城巖巖居人坦坦口德合口無疆冬十月口口
口口軍前更先帝洎慶緒嗣凶自洛奔鄴修好於
公公不口口口折口口口得請命口口三年二月
口口口口上以思明作藩於薊口口口口口口思明篤

叙不供賊鎮威衆俾公如薊將賊公口口口執忠
口口口口口苦口口口口口口口口口口口口口
大旱口滌口口口穀如焚人曰祈土龍公曰非早備
乃貶躬之食勤人之口口口口寅口朝而口口口口
口口口口口口口口口口口口秋雨旬口口口
匪害稼不書政冬十一月思明外公以其黨幸萬寶
張口口口口口焉口口口口口口口口口口自下
流口口口口口延於平人人用齋咨涕洟顙公如
天公曰不戢乃暴負乃人憂夏四月戮萬寶口口
口口口口口口口口口口口口口口口口口口五

州之侯或曰厚賦人。公盡人蒿焉封政不賦乃聳善
抑惡發滯劓佚蕝惠昭利。□□□□□□□□□□□□
□□易□□之□訪於定定□□文訪於深□修之文
訪於趙趙齊之克諧五州允奉如一虜不我制。公用
哆然惟八年□□□□□□□□□□受命其。王也
初朝義播亡係命於□公自□公歸。朝是翦厥
翼翼日。公會。王師於□郊恭行□□□□
□□□用勦焉時戎羯飲化爰方啓行夫戎性沓貪蔑
煞俘軼殫寶虔劉暴骨厚厲於懷人南自相魏邢貝東
至滄德瀛鄭□夫匹婦蕩在草莽越□。公境宣服

公威惕惕瞿瞿攝進成序若。公在首五州之人無荒

寧風行於冀冀億之景願附。公昭請於。上上

渠下望申命用良冀人熙熙嗜化永休惟九年冬

帝念宗臣特拜右僕射端武主戎摠經外政欽

酌彝典敬揚。天心繫。公德載於人人以蕃殖

冀贊。三主鋪敦四凶。聖咨乃賢神

被乃祿其惟有終盲才恒中耆老賈審祥。等師

錫言曰奸臣反常迭起東土人用瑳黷殆無指告惟

公牧恒。天眷尔下尔有。君臣公正爾有

公保尔有灾厲。公奠尔有稼穡。公成微

公疇依恒大圯也賡曰昭茂德崇豐碑阜成於文庶永
於世克建樂石勗揚頌聲頌曰

惟君配天惟配臣君驕驕我公為

君武臣翼贊皇家奄有世勳大盜踟躕荒

我東鄙孔填不夷元元靡恃恒人保公乃有父子我

豈載懲我年載登我用有孚尔無不承貞石峨峨永以

垂頌惟公之德不崩闕下

永泰二年七月一日建

右成德節度使李寶臣德政碑寶臣降虜與田承嗣
輩創藩鎮之禍其人本不足道碑辭脅下為諛餒讓

不文獨王士則者僅見陶九成書譜中不甚著而書

法道勁瀟洒有李北海張從申之筆良可寶也碑在

真定御史行臺不易塌弁州山人稿

李公者寶臣也予讀其傳每嘆屬奚附逆反覆不常

朝廷輒以偽署為真賜姓名授鐵券唐之不振至于

如此然竊計當時強藩互結不如此不足以慰來投

之心招未歸之賊按碑建于永泰二年七月追頌其

功則曰壬寅歲寶應皇帝嗣位冬十一月我亞相張

公忠志率東諸侯復命兩唐書無月日而代宗紀與

碑合九節度之圍相州也寶臣懼而來歸封密雲郡

金石錄卷九十三
公爲舊書所遺新書云擢寶臣爲禮部尙書封趙王
公又與碑異碑云授禮部尙書兼御史大夫成德軍
節度使封清河郡王賜姓改名此恒州耆老賈審祥
等頌之之碑立于當時必無疑悞何兩書俱不之及
而未載隴西郡王豈寶臣王封有二次耶抑兩書誤
以清河爲隴西耶如寶臣以五州未獻開東門納王
師而止封趙公則加于密雲無幾豈足以酬其志似
當以碑爲正碑在今真定府公署中巋然巨碣也豈
劉宋二公未之見耶

金石錄補

鎮州察院前庭有風動古碑乃李寶臣功德頌永泰

間立察院卽寶臣節度理所也碑文王士則書筆法

遒逸有漢人遺意絕似孟頫趙公所作因知吳興源

遠流長所本不獨一王也

隱緣軒題識

士則蓋武俊之子其署銜稱推勾官案史節度使之

屬有推官有衙推此推勾官疑卽推官矣寶臣之降

唐封清河郡王唐書藩鎮傳不載却有進封隴西郡

王事然宰相世系表止稱清河郡王疑傳之誤也

潛研

堂金石文跋尾

按此碑云在真定御史行臺又云真定府公署中
其實在察院署今察院廢而爲公館昶屢宿于此

三石齋藏書方十三

至必摩挲見碑字之精勁如前人所言書者王士則見韓文集兄弟皆能書

同

文化丙子

王集然幸得世系夫士再書四韻王集然之歸也

畫性識可憐王集善書藏書不嫌味有幾桂淵西橋

風雨兼宮作而兼地兼宮兼宮兼宮矣寶田之劉

士因蓋近刻之字其器會蘇蘇公官案史稍更刻之

數流身祖本不避一王也

魏碑

數幾有驚人畫意餘心孟懸鼓公祖非因映吳與戰

聞立秦刻唱寶田繪製既以輕文王士與書筆哉



